

武寧縣志卷之三十九

武寧縣知縣滇南李

藝文 雜著

宋

東軒銘

黃庭堅

分寧人

溫陵呂晉夫為武寧縣其轡勒足以御吏其俎豆足以和民以其身為綱以其僚為紀其有所急也民以為義其有所緩也民以為仁於其歲豐民間新作東軒以告豫章黃庭堅曰以此聽民非以勤民也予觀今之吏記三年則解體不治民亦厭之今呂侯不得代踰四年矣而勤民如始之日民亦安樂之唯恐其去也故銘以勸來者呂侯為邦如匠規矩除治燕處不即歌舞於此近之間民疾苦里無追胥抱孫買鉏吏



無重糈猛虎如鼠我班王春民在東臯于耜于餉勸其作勞
亟其耘耔無慢于傲役乃暇日于茅索緇桃李兌矣松柏峙
矣知我民稼雨澤時矣萬物芸芸自本自根於其並作我觀
其復富貴浮雲荷戈而逐呂侯燕居不棘其欲東軒高明有
突有榮以納日月以陳鼓笙侯在東軒左經右律燕及其僚
射侯酒食咨爾後來式鑑斯今無以豆觴費民寸陰

報慈庵銘

并序

釋德洪

武寧西峰達上人年方妙而孝思度越流輩父母喪則泣于
墳所旦夕誦唄以時臨遂自名其庵曰報慈嗚呼達可謂知
如來大師律我比邱之意經豈不曰孝名爲戒乎余謂其所
爲有補於名教乃爲之銘曰

竹叢生謂之慈竹烏返哺謂之慈烏豈吾含齒而戴髮乃彼
烏竹之不如故有終天之痛心再折而情枯蒔松楸以上雲
雨就樹陰以縛屋廬營世出之冥福生五濁之芙蓉知輪珠
以行道明月皎皎其影孤念此風之可尙聊以起精進而激
懦夫

按德洪字覺範號寂音晚號甘露滅江西筠溪石門寺沙
門工詩文與黃山谷善於靈源清上人爲昆弟此銘當由
海昏過武寧至黃龍山時作也

與呂晉夫帖三首

黃庭堅

冬暖而兩天氣未佳不審比來何似伏奉牋記累幅禮數過
當雖懷戢動重然甚悚仄不敢承也比以舟楫未泊淹留意
緒殊不佳遠承津遣開濟行李非仁哀孤苦安能如是欽服
高誼大不可言不肖於公家伯仲有一日之雅又德占家復

聯瓜葛徒以未嘗得望履烏故不能一通記問今者遭罹大故護喪葬田舍道出貴部茶然凶麓無緣參候伏惟豈弟之政田里所安縣齋虛閒寢膳宜適哀苦癯瘠雪寒手凍上狀不如禮伏幸痛察

按公以元祐七年壬申正月八日護母安康郡太君喪抵家則此書當在六年冬暮舟過武寧時所作

比辱車騎臨顧恩意良厚適到家日苦賓客肴具菲薄不足淹留君子於今愧悚比方掃除巖下草堂日親鋤灌林影水聲可以永日恨公不能來耳雙井四瓶皆今年極嫩者又玉沙芽一斤以調護白芽然此品自佳氣味但未得過梅香色味皆全爾公着意茲想不可欺也

別後忽復春夏哀苦窮窘多病嬰纏日力不自給久失修問卽日初暑不審何如伏惟平易之政民有畏罪懷人之心訟庭寂然縣齋燕處有以自娛聞代者已在湖口解印想必有期遂有相遠之嘆臨書增懷

書招清公詩

黃庭堅

草堂鄭郊處士隱處也小堂芙蓉盛開使鷄伏鴛鴦爲雛與人馴狎不驚畏老禪延恩長老法安師懷道遯跡雖與慧林本法雲秀同師頗以討飯養千百閒漢爲笑也清公少時蓋依之數年嘗教誨道俗云萬事隨緣是安樂法清公云如安禪師心無簡擇可愛可欽舟中晴暖閒弄筆墨爲太和釋智興書

題靈源門榜

釋德洪

靈源初不願出世隄岍甚牢張無盡奉使江西屢致之不可

久之翻然改曰禪林下衰宏法者多假我偷安不急撐住之其崩頽畦可須也於是開法於淮上之太平予時東游登其門叢林之整齊宗風之大振疑百丈無恙時不減也後十五年見此榜於逢源之室讀之凜然如見其道骨山谷爲擘窠大書其有激云

題昭然遺墨

昭然老人道大德博爲叢林所宗仰雖其片言隻偈翰墨遊戲學者爭秘之非以其書詞之美也尊其道師之德耳予游諸方處處見之開卷輒識其真精到之韻骨枯老狀蓋其退居時筆也南嶽見方廣圓首座出此爲示噫圓知敬慕昭然其亦賢於人遠矣

題真歸誥銘

宗師之于生死之際說法作偈者有之未有自作銘誥者也予觀昭然此文奮激頓挫精到無餘雖鳩摩羅什道安輩平時作爲且不能及况病與死隣者能爾乎蓋其道眼高妙唯道是視初不知其有死生之烈也不然何以卓絕高勝如是之盛哉拜讀不勝增氣

跋山谷所遺靈源書

熙寧元豐之間西安出二偉人徐德占一旦與草萊與人主論天下事若素宦於朝黃魯直氣摩雲霄與蘓東坡並馳而爭先二公皆名震天下聖世第一等人也而詩詞所寓翰墨之妙拳拳服膺於靈源大士如此則知彼上人者必有大過人者耳高安道人誼叟久從之遊蓄此書出以示予予祝之使藏之名山庶百千年之下知江南道德所在未全寂寥也

論修水

吳曾

修水在分寧縣北東南經縣治又經武寧縣東北流六百里至海昏又東流一百里入彭蠡湖世傳郭璞記曰有魚名儵有水名滌天下有事此地無憂言可避亂也予按陰陽書云水宜東流蓋巽居東方其次則比比乃艮方耳所以寧雖深僻險絕然代出偉人至若贛水皆西流所以自南朝以至今日人物殊少然則璞記滌字從水何耶按史記徐廣以滌音先糾反或恐通用也

法安大師塔銘

黃庭堅

禪師號法安出於臨川許氏幼謝父母師事承天長老慕閑年二十誦經通授僧服則無守家傳鉢之心求師問道不見山川寒暑初依止雪竇重顯顯沒則依天衣義懷雖蒙天衣印可猶栖法席數年同參皆推上之法雲禪師法秀尤與之友善以經論入微爲同業參元人不二爲同門故也辭天衣又探蹟鉤深靡不經歷年三十有七歸在臨川初授請住黃山之如意院破屋壞垣無以風雨師住十年大厦崇成僧至如歸乃謝去下江漢航二湖上天台四明沂淮汶而還所至接物利生未嘗少怠白首懷道蕭然無侶倚杖於南昌又遷宿於武寧之延恩寺延恩父子傳器貧不能守之初以爲十方始至草屋數楹敗床不簣師處之超然縣尹裴士章欲糾合豪右爲師一新之師曰檀法本以度人今不發心而強之是名作業不名佛事裴以師苦田因止不爲師亦住十年凡安衆之地冬燠而夏涼鐘魚而粥鐘魚而飯來者息焉以元豐甲子歲七月命弟子取方丈文書勿復料簡商略爲聚如

武寧縣志 卷三十九 五百六十七
共住僧數人與其一則示微疾其八月辛未終於寢室閱世六十有一年坐四十有一夏弟子普觀營塔於後山距寺百步師生平常教勸人萬事隨緣是安樂法師之居延恩人視之不堪其憂於是法雲秀常有衆千數百說法如雲雨所居世界莊嚴其威光可以爲兄弟接羽翼而天飛也以書招師云云師發書一笑而已予舊聞禪師爲有道而用晦者每嘆息其無傳晚得友道人惟清清之言曰我初發心實在延恩安公告戒策勵如父母師友中心以謂凡住山者法如是爾及遊諸方罕遇如安公者以是提耳之誨不忘於心若安公名稱利養實不能與天下衲師爭衡然自此不滿安公之一笑公可作石置安公道場使來者知住山規矩當如是于是追跡行李總其化緣起滅如此而繫之以詞詞曰

三際十方心田一契威音以來諸佛所印其中種子皆本來法東西相付唯證乃知證得相契如是而住爲萬物主是故無諍若有造作無印之契忘認界畔如空如海維此契心有無根樹問其所在則伏昌佃由初不知自本自根懷藏僞契算其邱角一九非九謂傳密記目盲如幻醫窮子眼披如來衣作大妄語見地不真與萬物訟見境崢嶸故多諍論土牛耕石終不得稻堂堂安公是大田主絕學無爲終日修行出入生死無作無造法佳法位無有爭地布慈悲雲雨一味法飛蝗蔽天赤旱千里而我境界萬物有年鑿井耕田不荷帝力安公法爾一切亦爾安公道場來者敬禮

與死心道人書

清公到高居計無不安穩亦頗爲衲子追逐耶然已是名滿天下恐終不得聞耳

與運使中舍別紙

惟清道人在雲居養道深粹不間親疎恨公未識之耳

與周元翁別紙

清禪師道眼明徹自淮以北未見此人

已上俱見山谷別集

葉別駕履和墓表

徐經孫

公諱履和姓葉豫寧廉村人經孫初筮仕與公同官長沙善相勸過相規也公官衡陽經孫以永興合沿檄過之見其盡心於獄有哀矜難已者嗟嘆久之及入京又與公同班且寓同邸朝夕追隨相得益驩甚別去八年庚戌春公爲邵陽別

駕復會於長沙握手論心追數疇昔恍若夢寐甫四越月而迎公之喪車於長沙門外矣嗚呼悲夫後二年經孫還朝其子點至京師爲公謁銘時存齋字子才爲誌庸齋趙汝騰爲書意一徐清叟爲題皆一代名人於是公篤實之學孝友之行清廉循良之譽益信於天下又十年點以書來告曰先君之墓木拱幽銘已就而無文以著諸外先生其爲點表之經孫惟公沒十二年庸齋意一亦已卽世今惟存齋與經孫復會於此感歲月之易流痛老成之凋謝而故舊子弟適以墓文見屬其又何能已於情耶公中紹定進士其行事見於誌銘云景定二年翰林學士知制誥徐經孫書

葉處士墓誌

周應合 邑人

豫寧廉村有隱君子葉公開字茂老吾大父拙庵公所善也

自吾大父沒後二十年間老成衰謝典型淪亡唯公巋然獨存十年前尙獲升堂省興居侍笑談爲歡旣薄宦奔馳不復相近景定甲子在鄱聞公訃葬且有日公之子馳書以公弟靜江別駕惟華所叙行實屬爲之銘誼不獲辭葉氏出縉雲唐昭宗時有諱琮者遷豫寧之廉村爲望族曾大父掄廸功郎新州廣濟縣令大父邦佐父天祐贈通直郎母雷氏贈安人公自幼穎異從厚齋李公習科舉業一日誦大學有得慨然嘆曰讀書乃專爲科舉耶遂棄去不與人接深居力行以自修者蓋數十年弱冠失怙哀毀骨立飯蔬廬墓事母益謹母病目不能視左右承歡日夜祝天目復明比沒復廬墓自鹿來馴士人賦孝感詩以美之平居讀書自娛闢屋與子弟講學論文油油夷夷如春風之吹物入于無際而子弟亦皆

以文章節義相尙仲弟閻貢禮部官崇陽死于難季弟閱亦貢諸子或以鄉薦或以奇童薦或以博士弟子薦公嘗曰出處雖異唯求無愧於屋漏而已公故有大才紹定庚寅歲隣寇迫境公乘機制變羣盜遁潰景定庚申兵復嘯聚數月公設策備禦卒賴以安其後晦靜湯公長白鹿洞舉以讓公固辭恕齋吳公興稽山書院招爲院長又辭荆溪吳公遣使奉書幣聘將薦於朝益力辭取伊洛諸書優游涵泳以自適卒年八十有九實癸亥十一月四日也娶蘓氏生子二采進武校尉調吉水征權連由童子科上春官女二長適進士黃釗次適進義校尉楊斗光以甲子十二月庚申葬於西溪之源公性恬淡尤喜種竹有竹萬竿自號此君園日吟哦其下不與世相聞陳闓仙贈以詩曰自是淵明一等人嗚呼如公者

真隱君子也奉議郎通判饒州護州事周應合誌

坦齋通編一則

侍郎邢凱邑人

詩人好改易地名以就句法蜀大散有喜歡嶺東坡韻詩人遇喜歡來遠夢地名惶恐泣孤臣自上而下第一灘在萬安縣前名黃公灘東坡乃更爲惶恐以對喜歡廬陵二十四灘詩乃云十八灘頭一葉身亦非也

按此一則前志於省志雜記內採入今查四庫全書目尙存有通編一卷已爲補傳詳藝文

明

志乘跋

邑令高燧

德明甫退然齋居所爲武寧志井井可觀獨以風俗爲憾而文不雅馴頗深惜之武寧山藪深密不善生殖俗重家室促

促自守無遊賈於外者以故民多貧瘠又耻降抑有所激射輒負意氣而恃相高罕有退讓之風余不忍外視吾民乃愍然憂焉夫風俗所關不少而長吏最爲親民教化從此始不可諉也第自郡守公而上訖御史中丞大夫級有差皆得而臨制之例不獲妄用且徃徃薄視其下而未必諒以心藉令稍欲振起其誰與我此縉紳先生談時事一日謂出吾民而登之席猶挽江河而行之山也若古賢豪舉天下而轉移之豈易言哉嗟嗟余理非其人獨念武寧環山易於興利而爲虎豹狐狸之所據又民有氣概可與爲善而亢厲自上相沿成習惜無有以竹木闢其利以仁讓養其心使吾民歸於富厚而自得也余固疎拙蒞政不期月又以人覲行自愧無所厝注用書於此以留後之賢令云浙江臨安高燧跋

題盛公大尹名宦碑後

董應芳 昆陵人

武令盛公德政碑前歲爲風雨所毀其子姓家於武者復立石於縣堂之左是爲丁未適予代庖日也因感而言曰公生平錢塘而令乎武寧善政善教藉藉乎二百餘年有令名宦於斯卒於斯子孫家於斯而衣冠盈玉樹之庭昭茲王母赫赫厥靈於以廕此衆生今安得有如盛公者而悵乎靡所儀刑

記與武寧令周道昌語

周希令 寧州

萬歷三十三年春余以扁舟過武寧泊龍潭而武寧令周君來謁且言曰邑東瓜原有瓜圃相傳東漢吳莖祖墓其上今尙稱吳王峯又傳宋江狀元萬里塋朱城原僉曰狀元山萬歷三十有四載鳴鳳山僧開徑至古洞下數丈許得石鏤文其上曰皇帝龍飛咸淳改紀後三年有江成政江淑恭助楮用修此道而咸淳固宋度宗紀年也其絕嶺鳥道避水峻路連雲石壁亦題有江十六郎數字則宋江氏之盛於此或由也然孫鍾瓜圃在富春以瓜餉客得葬地地志昭昭矣而江萬里以死難故勅葬都昌石沙灣其事赫赫在人耳目道昌有事於邑乘若此類者其承訛而不改耶抑亦引據古事以折衷之耶余應之曰古今事蹟之可疑者大都然也自漢迄宋以來其間廢興變遷傳述不一固有一人一事而異地互爲口實者在古人記載不嫌並出雖事跡難免傳會而父老傳聞亦豈容盡沒耶且郭公夏五尙不能不疑以傳疑况一邑之志乘乎遂相與大笑而別別之明日偶記斯語於舟中且併寄武寧公卽據吾說以進一解可也

與盧立字帖

潘元齡 邑人

眉山一布衣耳年廿五始發憤為海內大儒足下聰明才辨迥絕一時又年且少宜勉之無讓古人呂大兄竟暴死薛城如何如何足下聞此當亦放聲大哭也

畲羅上舍書

沈秀 錢塘人

上舍諱通進士羅士應之裔士應登洪武乙丑進士有坊在南門後毀于火上舍欲修復之恐格於例余作是書答之

上舍足下前接手書以令祖進士公石坊燬於火慨然欲修復之而思本朝會典無或許後人重復修砌故事殷殷下詢意思慙慙良足嘉歎秀實待罪武寧五年於茲聞進士公文行最高常以不及親見為恨及足下歸自金陵備悉原委知其出處大節有古儒者之風益令人希慕不置夫進士莫不有坊而坊不足以傳進士如令祖真不朽之人也何係乎坊之存否哉今坊雖廢而遺蹟猶存秀每過其下輒低徊不能去若足下力能修之則觸之於目而思之於心所以興起百世者未嘗不於此而在也凡宦斯土者莫不願其子孫能發揚先人之芬芳以傳之無窮况素所嚮往之人乎傳曰禮以義起此一舉也固上不干國家之令典而下足以醇令祖于重泉足下幸勉力成之不必他慮秀再頓首

李明經墓表

御史高應芳 金谿人

余弱冠遊邑校中聞象山先生尊德性之學超然契悟及覩鹿洞遺規剖析義利曲盡幾微聽者汗愧泣下時晦菴先生命學者立石洞中垂訓百世私心竊嚮慕之嘉靖戊申歲遂掉扁舟泛彭蠡徑造白鹿洞而居焉意必有理學之士養晦

其中者得以聞朱陸之風而興起也維時龍川胡子崇野聶子少泉桂子竹溪陳子及柳峰李君俱以列郡之士景從雲集遂相與傾蓋論文于一堂之上對越朱陸服膺孔顏朝夕淬礪疊疊忘倦蓋不特時誼之相長而已暇則歷金井探玉淵溯三疊之源陟五老之巔尋幽覽勝悠然自得真有浴沂詠歸氣象既而胡聶諸子迫余先后委質策名帝廷而李君值數之奇久困場屋然其志益堅學益進噐噐然不以得喪爲欣戚歲壬戌謁余于嵩湖之濱因告余曰人生逆旅也文章木瘿也富貴功名浮漚空雲也惟立德者爲能不朽噫李君之言其裨余者深矣李君悟本之學亦可以概見矣而竟不偶至隆慶丁卯督學使者始錄君姓名貢南宮試金水橋合式候選銓曹給假回籍逾年一疾奄然長逝萬歷己卯季冬仲嗣堯言泣血捧狀跪詣余曰此先人遺囑也願得一言死且瞑目夫李君自孩童時夙秉懿德事親孝事長弟與朋友信設教鄉閭彬彬髦士其行誼之大者具載墓志中不必復贅矣獨其德豐命蹇賁志以沒至于易簣潰亂迺能遊神千里之遠追憶三十餘年之交而以銘屬余長嗣庠彥堯章繼君謝世不及躬訃而仲嗣堯言又能敬承七年之命不憚千里雨雪之勞而以遺囑告余均有足多者嗚呼九京可作必以余言爲知己也而李君之目始得瞑於地下矣遂撰次其事付堯言持歸表石墓上以詔來世俾後之學者知友誼之關于人者爲甚大云御史金谿谷南高應芳撰

國朝

汀州司理盧公雲菴墓誌銘

工部侍郎周亮工

癸卯冬盧生斌憲走數千里詣雲門而訪予爲述其先公狀長跽而請曰嗟乎先君子之變不孝凜凜惟覆巢是懼僻處閭里旣不獲侍湯藥又不及視含斂不孝罪通天顧念窀穸未襄何敢以身殉所冀錫之袞榮而彰厥懿行則大人先生一言是賴惟先子與先生共患難久知先子者莫如先生敢昧死以請嗚呼余何忍爲公志哉公千尋之幹蒼禽直上而以予故遭摧折予之罪也予則何忍爲公志顧旣不能報之於地下而復不能使其懿行傳之當世予罪滋重爰拾筆雪涕而爲之志公諱圖龍字兆羲雲菴其別號也盧氏世爲貴族自崇安公卜居柳山之麓爲球場盧氏崇安公生陽春陽春生孔秀以武勇聞仕驃騎將軍驃騎公生若愚若愚生

廷鑑著述自娛不受徵聘子五人仲曰瀚則公父也公方孕而父見背惟母周孺人是恃三歲通章句八歲解筆墨見左氏傳及先秦兩漢諸大家文欣然有會若夙授顧不能購徃徃假之親故寓目成誦人咸異之弱冠補弟子員學使侯峒曾奇之拔冠軍曰此文中干將也氣熊熊上無足當鋒銛者一時名噪甚甲乙之際土寇肆毒揭竿蜂起公奉周孺人倉皇出避時斌憲方離襁褓周孺人矜之曰兒孱甚謹魍魎之無我顧公愀然曰後吾母而先其子人將唾我餘棄之去竟得俱免丙戌舉於鄉公無喜色值大荒饑仆者載道公詣邑令抗言曰民病矣老稚且立盡彼壯者甘溝壑死耶盍亟賑之令納其言民乃小定咸加額曰維令其可盧公活我未

幾大帥金聲桓以其黨王袞據城叛偏裨四布所至蹂躪守武寧者曰鄧雲龍尤慘烈公援大義責之觸怒幾不免及大兵至叛將被圍公乃走見大將軍曰賊所以盤踞未下恃外援耳然可誘而離也不煩加矢而折箠使之卽百姓無兵燹苦策無善於此者大將軍領之公因反見雲龍曰會城旦夕下義旂且西指將軍自視強兵勁卒孰與金帥高塘深池孰與省會智謀勇畧孰與大將軍今大將軍率六師屯會省取金王首如寄而將軍欲以烏合餘衆覬萬有一勝何可得耶大丈夫總甄翼之士不能稍自建立取功名而以頸血博健兒衣食竊爲將軍耻之雲龍曰奈何公曰將軍非首亂者爲帥脇耳今誠改圖則將軍固國家之忠臣也請東見大將

軍解之雲龍曰謹受命公則復走見大將軍具白雲龍願撫狀大將軍從之武寧以安壬辰選汀州司理汀治萬山中故多盜居民苦之團結堡砦相爲守望其後有一二骯于法則逋匿不出吏不能捕輒請兵兵肆其毒而民不堪命乃益激爲盜公至下令曰爾輩非巨擘也官府不察畏罪深匿弄兵自衛耳誠自首則我能活爾不則必加兵加兵則玉石焚妻子爲戮悔無及其謹自擇於是其魁孫文奎匍匐庭下乞自新公爲請之當事得不坐諸堡聞咸散去汀俗健訟公抉摘情弊犀燭洞然諸蜩譖鴟張者以所誣之罪罪之而澆風頓息然公故宅心豈弟在亂彌整一切深文峻法謝不事公旣名甲諸郡當事倚爲指臂羽檄方馳主客餉亟悉委於公

公聲色不動所需立辦公至性肫篤迎母就養於汀定
省必時雖事務叢集而豆觴醜浣無不誠敬以將母卒
公雞斯徒跣纍纍顛顛面黑骨癯見者泣下顧貧不能
戒徒御郡守王公高其義贈以金始能歸甫到家閔免
襄事苦由未寒而緹人至矣嗚呼公之逮蓋緣予逮也
先是予在閩失貴人歡構讒解組待罪燕邸去閩一年
而公始爲汀司理同讞其事時主者承受意旨煅煉周
內莫敢誰何公爭之不得則微詞諷之又不得則移疾
避之不肯署紙尾名而主者代署公無以拒會予以質
訊至條答顛末事求左驗讒者之舌乃橋而億萬士民
復爲予號訴稱冤不已主者色沮公奮筆具其狀得平
反如公議上西曹又以前後異議逮予廷鞫并逮公及
諸同讞者公體癯而性伉直至是憤甚仰首呼天目皆
盡裂曰神之聽之好是正直其不然哉其不然哉乃遺
書囑其家曰兒輩謹自愛惟力田是事襪襖以供菽水
而已他何求乎爾父德薄緣是受顯罰不足效也投筆
氣結而死嗚呼痛哉予嘗讀史每見古執法者如張廷
尉徐侍御皆能伸臆一時流馨百世公竟坐平反以死
天乎人耶公生於萬歷壬子卒順治己亥得年四十有
九將葬乃銘其墓曰

稽古靈修作德日休百祿是遒如公之德言言翼翼世
德世則食報宜豐大節敷功以勵臣忠云胡好善適逢
其蹇困於罝網匪公之辜公辨予誣而公卒瘞公以予
死命也天只公死猶生爾荃爾蘅爾神爾明令聞不已

爾姓爾氏爾孫爾子予則何心痛切人琴朋喪盍簪浮
生若寄誰能久視公也無憺鬱鬱葱蔥爲公幽宮何窮
何通收泪拂氣勒銘此石永矢無斃

景定建康志跋

朱彞尊

建康志五十卷宋景定中承直郎宣差充江南東路安
撫使司幹辦公事武寧周應合撰歲在戊午春予留白
下亡友周雪客語予曾睹是書闕本訪之三十年未得
也今年秋九月過曹通政子清真州使院則挿架存焉
亟借歸錄之應合淳祐間舉進士嘗爲實錄院修撰官
以上章劾賈似道謫通判饒州自號溪園先生康熙丁
亥十一月竹垞七十九翁彞尊書

按四庫書目註云是書乃其以承直郎差充江南東
路安撫司幹辦公事時所作也初建炎二年建行宮
於金陵改建康府設江南東路安撫司以治之爲沿
江重鎮乾道慶元間屢輯地志而記載尙多闕略景
定中寶章閣學士江東安撫使知建康府馬光祖始
屬應合取乾道慶元二志合而爲一增入慶元以後
之事正譌補闕別編成書首爲留都四卷次爲圖表
誌傳四十五卷末爲拾遺一卷援據該洽條理詳明
凡所考辨俱見典覈如論丹陽之名本出建業論六
朝揚州嘗治建業後始爲廣陵一郡之名皆極精核
光祖序稱其博物洽聞學力充贍不誣也明嘉靖萬
歷間是書尙有刊本在南京國子監見黃佐南廡志
中然所存版止七百五十九面則亦已闕失不全其

後流傳幾絕朱彞尊曝書亭集有是書跋稱周在後
嘗語以曾觀是書闕本訪之三十年未得後從曹寅
處借歸錄之始復傳於世云

上甘大司馬書

余騰蛟

夫子閣下往者蛟得拜謁 京邸年少氣浮大言無狀
夫子不以爲妄引而進之又於所知過爲稱許感愧彌
深南旋以來寒暑六易未嘗奉數寸之簡以通殷勤此
宜大君子所屏絕而卿大夫自北來者每能道蛟姓字
問其所以則曰大司馬甘公云云或曰某公述甘公之
言也蛟何以得於夫子而夫子拂拭之如是清夜捫心
實難爲地廼者閱邸抄得夫子疏以蛟應 詔接讀之
餘心震掉而不寧者移時蛟何人敢以與此旣又念大

君子德量如覆幬之無私蛟托宇下卽不能仰副盛意
亦得自輸其誠敢布腹心於左右幸少鑒察蛟質本昏
魯學無淵源先君養育於垂暮之年幼習村塾與諸子
弟操觚角藝不知有古稍長從先君行阡陌間口授漢
魏古詩及左國公穀史論五六百首皆能成誦若有所
得遂妄作長短言摹倣古人文字先君不之禁因自以
爲能已而泛覽經史百子益自負搖筆成章不復深求
以爲詩文不過如是而人亦竟以此事屬之究之律以
古人之堂奧已之所見固非卽人之所許亦謬也年十
九始交同邑盛謨及其弟鏡樂三子者皆力學隨父任
洎陽不爲邑人所知獨與蛟相得甚其季弟樂於蛟尤
洽蛟性拓落樂益豪邁出入馳騁頗能振動一時蛟樂

之名徃徃流於人間而盛謨落落自存若不與聞然古學一脈實自謨始其力於古最久所得古人之塗徑亦最深樂之奇快有過人者然縣流噴薄風霆瞬息而無紆徐徃復之致其間渟洄盤蕩滙而深之靜而持之使人淵然而不可測則於謨庶幾焉如蛟者少時所作既不足存而近年紛紛應酬紙筆狼藉與古人相去甚遠徐巨源云古學敗於應酬非應酬則詩文不能盛蛟之浪得虛名以此而不能追配古人者亦以此也夫以博學鴻詞求人於治平百年之餘其高者必翱翔夫雅頌作者之林次亦不失爲賈馬韓歐諸家出而吐其胸中之奇以鳴一代文章之盛蓋亦千古異遇而顧以蛟參其間甚非所宜傳曰量而後入蛟蒙夫子愛一日振拔之不少遲疑此在草野微賤感激趨承之不暇而蛟獨逡巡自却難以應命者惠傷夫子知人之明有失國家收才之實效也又家有老母齒髮枯落常患目疾不敢遠離伏惟夫子矜而全之若必欲得人以答 明詔如所云謨者齒尙未艾其所著字雲稿左氏錄皆有成書夫子取而閱之亦足以見蛟之所陳非故爲推讓也蛟賴先人餘蔭有薄田數畝足供僮粥榽戶空山讀書十年稍稍成就得以少效馳驅仰報厚賜尙或有時區區之私肅此奉謝辜負深恩無任悚仄死罪死罪謹再拜書存吾園記後

王世章 瑞昌人

余子薺菴與其弟映瀾築存吾園既成劔山盛水賓有詩八詠其仲兄于埜爲之記賓竹堂必特書園勝在竹

也亭隱竹中不書竹見水賓記池名浴心余改爲浴星
 夜半從竹間視之池水中常有數大星而西方宿尤好
 入池中正南無竹少東古松八九株狀傲詭其一若老
 人之僂者其一若虬龍之飲於河薺菴曰是宜爲閣閣
 面池簷際可俯而憑者蘭嶼或大風怒號疑有神人驅
 灑灑之堆自樹間來閣上由閣至賓竹堂有二道一徑
 入一深箐中肩頸相摩由瘦雪亭入園西多竹少隙處
 叢椒雜之屏其翳而門焉入門轉北行再折而東得少
 廬左爲艣狀半在水面又爲小屋三間橫艣尾曰冰房
 字書屋不齊爲房其制倚於墻陰雖白晝惟見柳陰密
 覆齒齒白石側立池岸柳陰之間啟兩扉如月與賓竹
 堂通薺菴兄弟設講幄率諸弟子陳說今古絃歌洗爵
 之事必於堂賦詩長嘯舞劍擊筑多在隱濤閣或少廬
 堂四楹浮柱閣總四達廬容一几一床坐少廬不知有
 賓竹堂隱濤閣閣望少廬容與澹浮若載半艣以游於
 池園有四池近少廬者二所畜富於瘦雪亭池三倍然
 不如面隱濤者其廣可種芙蓉千葉也

書盛季子傳後

主事 陶其慤 南城人

季子天下士也其奇傑之氣浩瀚之才有不可一世者
 唯賓竹君力足以出之蓋其相習久相得深出入往復
 之際固非他人所得與焉慤讀季子傳鹿廬於中者累
 日有客來言曰世人貴遠賤近季子誠才君輩盛張之
 毋乃使人謂相獎借以樹聲乎慤曰嘻人不知有季子
 與知有季子而以其近而疑之皆愚也季子間世而一

有趙山南比以鳳凰芝草其存於世者片紙隻字皆入古吾恨力不能盡暴而子固謂張之耶百世後自有知者吾與賓竹君安敢避井甕中語以自沮也客慚而退遂書其語於傳後以寓賓竹云

盛教授墓誌銘

謝鳴謙

南豐人

山中以文名天下者天下學者皆知有武寧盛氏而其能皆出於教授公公少嗜學治經書廢寢食尤深於春秋出入左史秦漢爲文日奇肆無涯出以示人人不能讀時習尙卑靡學者不知有古公崛起童子中務爲深實宏博有濟於用卽與時不合益賦詩著文犖犖自喜及冠補諸生三年選貢士入太學與內翰何焯論史焯異之退曰天下才也太學生帖帖屈服丁內艱數歲復遊京師無所合久之選授樂平縣教諭十九年稍遷教授吉安府又四年致仕方是時仕途多闕茸廣文故冷曹譏彈弗及公獨慨然以師道自存進諸生於古繕竹房開講席設廩廚食其貧而無貲者一以程度校其能爲上下凡所受後先進退皆有門戶可理有二生者以不友聞公蹶蹶曰吾師於是而弟子若是何可問召至爲詳述古今孝弟事動以天性復自傷教化不明齋咨太息聽者屏氣斂容二生皆流涕頓首謝遂相友愛終其身當是時清厓盛先生之名播於湖東西間後生想望丰采者願得一就所聞無何而公歸且告卒矣公旣卒公之諸孤傳公所著者曰春秋心傳曰清厓集曰詩藪而公之子及公之存已有名士大夫間其後季子樂

以博學鴻詞徵仲子大謨以經學薦海內士莫不知有
所謂武寧盛氏者武寧於江右地稍僻人文濶絕二十
年間馳驟風雅後先相望郁郁乎爲豫章名縣蓋武寧
風氣自盛氏開而公之德教灌輸後人者隱然盛氏老
泉於戲其可以弗朽矣乾隆辛未諸孤旣得吉於西郊
少白山之陽乃奉狀乞銘於南豐謝鳴謙謙謹按狀公
諱際斯字成十其先浙人明太祖初立以盛文郁爲武
寧令因家焉曾祖準邑學生祖貢處士考德壽邑庠生
以公貴贈修職郎妣李氏贈孺人公生於順治庚子八
月二十二日年七十爲雍正己酉以閏月四日終於家
娶李氏生大業邑庠生繼室鄭氏生大謨歲貢生鏡隱
不試樂拔貢生女三壻陳恭次諸生余魯次陳瀚孫男
九姪燭周郡庠生樵匡牧琴夫瑟孫女九曾孫男二崖
峰曾孫女三大謨言先君性莊靜寡言笑與人接必以
禮端坐竟日元精炯炯然課謨輩以古人學期於有用
不必期於用如是者數十年如一日云銘曰
阻岡依澗瞻矚億戶有樂斯土鬱葱哉是爲盛氏文章
祖

余司訓墓誌銘

盛謨

修職郎余公諱文梓字季良號山翁豫寧人明處士諱
化之季子處士深於易通焦氏之學錯綜其數周連洞
札凡所遇歷虛豁呈露悉如其則十不遺一一日語其
配王氏曰吾將有大難病垂死然不竟死死數日復生
生且得賢子女唯謹侍毋棺吾已而果死死七日果復

生歲餘乃生公公生而俊邁與羣兒自異稍長知讀書
刻苦卓立爲文蕩然復古不爲風變族太學生五叙以
能文遊京師有重名遇人皆平視無可意者及得公
則引服自屈莫與之先公故有才深沉通博不屑屑小
用自舉秀才食餼僚侘久不遇比餼滿以明經貢公已
老遂絕意於世授其子以經閉戶不出丙午以次選袁
州萍鄉縣訓導甫朞勅修職郎致仕終方公旣冠歲甲
寅白頭兵亂白頭爲江西總鎮楊富軍楊富以事誅餘
黨流靖安素其軍故用白號白頭兵兵無統屬皆少惡
慄悍專意抄掠蹂躪近縣漫患滋甚時遣使致書秀才
余倫使爲先道倫得書惶惑失措急召公議公從容語
曰白頭禍民實甚若見助如生靈何不如因而擊之倫

曰謹唯命公遂陽爲輸誠厚結使者陰與中泮盧氏諸
路聯爲犄角設伏於長墅兩山獨聚精兵隘口使人潛
旗鼓密林間遠近疑應次日白頭兵至及隘公率敢死
者百餘人突起掩擊賊駭且走兩山伏發矢如雨疑軍
聲震天賊亂自殺相枕藉死斬首無算得努戟戈矛之
屬千有餘具兵遂潰事不以聞丙申邑大水城壞人溺
死田屋漂沒縣令懷印綬跣且走時潭埠居人會夜半
水至急不得走遽登樓樓溢踞屋上水益張洪濤怒喧
屋震駭不可保男婦悲號其上危若累卵公自山督家
僮十數輩編木爲桴繫長縵一人屬縵一人援引屋上
迎縱往來悉出所居人凡三百餘口是歲天大旱邑旣
經水復荒旱人人不自存公傾廩賑濟量戶分給無遠

近皆周全活甚衆處士始取程氏生子三日榛曰楚曰
森程沒繼娶王氏生公處士固愛公年且老屬王氏曰
此子當大吾門唯爾是成幸毋廢比喪公始十一歲教
訓成立皆出母氏公孤苦既自立岸然異於人其所施
皆天下事能大用然卒不遇公生順治辛卯正月十六
日卒於雍正壬子二月二十四日以甲寅四月葬鐘林
原從先人塋嫡配胡氏生子偉早夭後鄒氏生子二長
曰騰蛟選貢士次曰螭能文孫男曰世蓀於謨爲壻葬
既四月將立石蛟具述乞謨銘謨知公久又以文爲蛟
重不敢辭銘曰

維公之興厥德孔碩逢天憚怒靡所定適蘓我於涸釋
我於孳而復康好於公見全公賦既亶克疑其休順德
之行胡不悠悠位竟修職曷爲稱施曰繩其武利於後

詞

跋溪園唱和冊子

盛樂

秋水泛輕舸風迎上客鞠香浮綺席醉入詩腸雲連寓
柳峰前波接來蘓渡口范張鷄黍恰踐約于今宵郭李
笙簧記通聲于曩日攜來滿城風雨幻作數幅烟雲冠
以重九僕本恨夫君還情種舒王祭之積愆何處登樓
日至寧護沈約之沉疴長年鍵戶况乃時當結蚓一天雪盡下
寒廬地是交蘭百里才人延廣座良朋惜別並唱河梁
落日之詞遊子悲秋獨彈隴首飛雲之曲對月吟無賴
聞歌喚柰何未免有情誰能不嘆嗟乎經年聚首萍渺
渺以隨波異地關心雨霏霏而入夜罄千樽百榼之酒

力莫倒愁城集三唐兩漢之詞鋒難遮別路歲華盡矣
日景凄然君到鸚鵡橋邊還持是卷我立狡狴石上更
盼何人贈言各擅所長予懷畧盡於此乙丑大寒日留
雪病夫呵凍書

徵修縣志啟

乾隆己亥春

盛元績

古艾封疆人物壯山川之色西平桑梓文章流耆舊之
芳注情志於編摩職方有乘寄溯洄於烟水風韻猶存
子直儒宗參考亭之正學草堂詩伯分山谷之餘香大
抵星屬斗牛龍光自煥抑由地鍾靈秀文物時新問俗
觀風是所望於太史拾遺補闕端有賴於後賢乃索傳
書僅存馮志時更百載事蹟闕如人歷三朝風流渺爾
曾經補輯不無聚訟之嫌苟欲校修恐爲任怨之府茲

值重修郡志自當上獻完書奉檄徵繕將取資乎金穴
聞風慕義已樹望於士林盧文學以腹笥便便獨捐重
費 梁明府則文壇卓卓樂輯新編顧縣志之闕修郡
將焉據嘆前書之失實事且無稽若使贗本竟行未免
中郎傅會就合殘稿再續安見開府清新曩歲捐修高
義久推別駕謂盧斯時濟美大力仍仰素封爰告同人

共襄盛舉或蒐羅逸事或考証舊聞倣通志之體裁典
型斯在集諸書爲根柢華實兼收去僞存真應凜前車
之鑒事增文省無貽覆瓿之譏惟冀知無弗言還祈出
而不吝庶琴堂政暇咸仰紀載之公府檄星馳得備輶
軒之採濡毫以待計日而成謹啟

徵修學宮啟

乾隆己亥秋

盧金鏡

蓋聞賢關日朗辟雍恢首善之模聖澤川流芹藻美作
人之頌濟北宮臨泮水金碧焜煌斗南士集橋門聲華
爛漫木天聳構儼然見聖於牆山國同文久已奉祠於
武春深鳳嶺泰岱之風雨相通秋爭龍潭洙泗之淵源
可溯入廟而觀禮器恍聞木鐸之聲登階而凜步趨彌
切杏壇之望粵稽歷朝遷卜若西澗與東瀍載考當代
葺修由乙巳而已亥因循故智誰搜川岳之奇沿襲舊
規未盡網緼之妙極經營兮慘淡地儉東隅瞻象數兮
昭明憾貽角度年更望五正虞棟折而榱崩錫靡晝三
恒欲珠聯而璧合時則 梁明府德星久照古今之文
獻爭暉兼值 許糧臺法鑒遙臨山水之精英畢露纂
修偶暇詹體兆於坤乾運會將新定天心於子午玉枕
延玉屏作對六秀凝祥寶塔引寶氣彌空三垣備美崔
嵬傑閣奎星瑞映文昌內外潁池夾鏡光聯太乙同時
並建奕葉良謨然而漢殿傳奇幾見玉梁自下祇園作
幻不聞金地頻鋪力同愚叟之移山寧辭一臂勞比武
擔之運由用荷雙肩幸好義其有人潘君首倡爰克徇
乎衆志大殿專修十月中旬課云戩穀千秋偉績賢合
思齊是用遍啟名流統咨國老解囊歲事亟肯構於黌
宮集腋爲章大告成於

宣聖滋培根本匪同福果之無稽仰答高深還冀光華之復
旦或鄉分一役井其算而賈勇有餘或任合數人鼎厥
圖而建功尤易千緡固當居上席寸木亦可附岑樓果
其慷慨急公殷勤赴義貞珉深刻古蔓美欲生金汗簡

特書華袞榮堪壽日將見浮圖挺秀飛來震四之峰殿
閣凌空摘取魁三之象地脈開而人文競爽靈貺自甄
天星曜而

綸綍交輝休徵洊洽則升堂入室光儀仰日月之高卽附翼
攀鱗意氣歷雲霞而上龍門厚望雁字先聲謹啟

新村鍾氏義舉錄

邑庠 鄧 敏 六核

鍾氏盤附新縣村業耕讀敦樸素無或務聲華博虛譽
者有鍾帝拔者與其淑配盛孺人以勤儉起家嘗以廩
粟活人鄉里稱便帝拔歿伯子振三仲子龍常踵而行
之嘉慶壬戌大旱季冬雨雪寒甚伯子起謂仲子曰昨
夕嚴寒重衾莫禦貧者可念矣仲子曰兄旣念之上歲
質衣衾者盍不責償而紓其困乎遂同請於盛孺人孺
人大喜稱善越歲仲春孺人又以粟周十里之內事聞
有司明府劉公少府傅公熊公洎戎台張公合嘉之各
贈匾額致鍾氏之祠而懸焉夫吾邑三百里富倍孺人
者甚衆顧未有先孺人爲之亦未有後孺人而繼之者
宜閭邑稱道之爲諸父母所嘉許也

書徐州紳士贈明教諭姚公琴坡歸武寧張本王賓二

序後

副貢 李葆光 良玉

讀書知人非必希奇間出也鄉里有道之士爲一時所
範模可徵於後世常使人流連不置焉吾嘗閱萬歷丙
戌徐州紳士贈教諭姚公琴坡歸武寧序二首其一爲
張本作載門生舒蒙廕舒鶴翎兄弟先世原由武寧籍
徐其祖登嘉靖會試二舒能繼祖志復得琴坡公之教

導者也其一爲王賓作載門人十五名三賢書十二諸生叙公以隆慶貢謁選銓曹初教浙之衢後司鐸徐州聲動當途獎薦屢賁旋以解組南歸引分自足祖餞欵歎道左相望一時以爲不減疏氏風自萬歷丙戌迄今二百二十餘年耳予嘗至桂中謁琴坡公像衣冠肅然可想見其道貌其後人出手卷讀之則徐州所贈詩文也夫弟之於師固多頌美然擬以居端宅揆與聖賢門墻相比埒而離索之悲有恨不能盡平素瞻仰者則又非尋常溢美可知也而縣志不詳公之爲人又紀爲仁和教諭與此互異嗟夫古賢之湮沒以待後人表揚者不獨公也若茲序與詩文之所稱夫豈無所表見者哉

錄張紀政公

張翊

公諱令紀政其字也家貧不能事學耕田以養其親蓋無所知者一日其父疾且頓涕泣不知所出五鼓起爨浴焚香禱於帝剗股肉噉其父疾竟瘳傳曰今之孝者是謂能養求諸今能養亦寡矣安居或不得食於其子或親病而不進藥嗟乎斯猶人乎哉夫毀傷肢體固不足爲孝然通志備錄不遺者豈非雖失申不猶愈於慢哉

明孝子胡公英良先生墓表

方瑛

嘉慶某年胡例貢大馨同弟庠生大魁得明孝子胡公英良先生之墓于栗榔鄭家蒲從而修之俾瑛誌其碣瑛曩嘗謁文廟孝子祠見先生姓名心竊記之未悉其孝行何如也乾隆己亥從襄縣志知先生讀書務實少

遊於庠以怙恃早失祖母盧年老多病遂淡於進取左右就養盧享年九十皆先生調護之力顧予獨怪先生文行卓然萬歷間胡氏家譜曾經手飭紀載宜詳乃今譜僅載公娶余氏子五孫一遷寧州武鄉外此不獨字號無傳而生歿葬地亦畧豈其子孫播遷異地遂至弗詳歟抑明季兵燹故牒無存歟又載先生爲右丞紹遠公七世孫兄弟三人先生居次則終祖母養者當不獨先生也豈兄弟多故耶乃先生之孝行難詳先生之芳名不朽其至誠所結必有不可磨滅者歟

觀風課士引

邑令陳瑞球韻石

粵稽武邑輿蟠江表部析海昏華路初夷艾封武闕食邑積四千戶之廣修江注七百里而遙珠懷玉韞之鄉

鶴駐鳧飛之國山水糾鬱雲霞吐吞九宮撐昊緇羽之所棲遲四望環流騷墨于焉嘯咏雄連吳楚秀甲東南洵鍾毓之奧區抑騰驤之雋地也則有崇岷挺幹遠淑褰芬士氣觥觥人才嶽嶽賜緋雲爛選重登龍綰綬風清歌傳渡虎諫草孤焚直不撓而似缺戎旌疊握靜難撼以如山別饒林壑之娛大具邱墳之嗜鴛鴦鏡水蝌蚪浮河著述等身科名艷齒前徽未沫嗣軫方適抑有名賢躡屐逸客投簪井舊名甘山重字柳風光月霽分參茂叔之圖山高水長借署嚴陵之額蕪黃殿古韓李亭高畫張有美之堂詩綴無憂之館固已清暉延賞觴詠日新亦惟妙蹟流棊簡編逾富者矣瑞球傳經夙稟學道曾聞歷逐槐忙聯邀杏捷芸臺撤炬舊讐東觀

之書蓬島迴帆遠轍 西清之筆空笑一行作吏敢云
三折知醫然而符難墨綬夢尙青氈甘苦粗嘗升沈遞
閱堪作識途之馬聊爲借鑒之車讀律愧未十年談藝
猶能一日爾多士于 月 日橐管偕來拈題共試吟
餘刻燭課罷傳餐所冀摘藻揆天鏗聲擲地湖連彭蠡
滙萬頃之波瀾嶽近匡廬攬一方之雲物詩繪西江之
派文尋幾社之盟尊經啟閣二酉遐探登仕題橋雙丁
迭噪此時靜闢琴堂特進諸生而語他日假歸鈴閣謬
膺先輩之呼忭舞良深觀摩倍切謝頭銜於牛馬漫說
輶軒奮腕底之蛟龍頻覘村柚各抒夙抱無負慇拳

江西通志進賢奉新武寧城池志辨

鄧匡淳 蕙菴

江西通志進賢縣明正德五年知縣朱南英三十年知
縣陳鎮崇禎十三年知縣李允佐

國朝順治九年知縣王家正康熙二年知縣王虞奉新縣萬
歷間知縣胡東陽李呈芳周道昌崇禎十四年知縣璩
伯崑

國朝康熙三年知縣馮其世武寧縣嘉靖間知縣姚永成王
紀十二年知縣劉源清三十七年同知袁株三十八年
知縣程光甸萬歷三十六年知縣周光祖四十五年知
縣沈景初

國朝康熙三年知縣聶當世均事修葺不一書大都先紀地
次紀年次紀人次紀事井井然有條覽者善之而不知

其誤也予考南昌府志建置卷知縣劉源清以下屬進賢知縣胡東陽以下屬武寧謂通志誤以進賢編武寧以武寧編奉新而奉新縣志與通志同實沿通志之誤蓋有秩官表可據焉既讀秩官表知縣姚永禎王紀皆進賢令則誤編武寧者不惟劉源清以下也知縣朱南英陳鎮李允佐王家正皆奉新令既不得屬進賢於奉新并無可考抑又通志誤以奉新編進賢而其地舊書殘缺失所傳聞遂沒其實歟且知縣陳鎮南昌府志一以明萬歷三十年爲奉新令一以明嘉靖三十年修進賢城其有兩陳鎮耶則秩官之遺也其無兩陳鎮耶豈不因仍通志自相矛盾哉一書誤後來踵弊者相繼久之乃不可更類如此至若同知袁株秩官表逸其名或署篆故不登永禎永成名小異亦有訛奉新令黃虞再國朝順治十七年任與通志王虞紀年合疑校編時黃訛爲王以再字屬下文直曰王虞尤失檢云

明勅授奉直大夫浙江按察司僉事方公墓誌銘

明尚書周其雍

公諱孟縉字朝儀豫寧塔溪人生於宏治乙卯八月十四日年二十八領鄉薦四十成進士授刑部主事又七年公卒時嘉靖辛丑七月二十八日也公性剛直有胆畧摩孺引天下事爲己任自少壯以至于死不少挫變內外所施皆大事歲乙未授秋官時貴戚張延齡驕蹇不法結交閹宦表襮犯科與百姓爲仇又從仁壽宮襲取寶玉篆養門客術士軒轅煽惑事不可詳既覺鞠者

私回狀以聞公怒權不屬莫可如何既而天子有重讞之命且不擇新進士公與王佐會議竟坐之廷寮懾服先是江西漕運以吳鎮爲水次地偏而弊苦于民往往召亂會公出理請移兌豫章上從之擢刑部員外遷浙江按察司僉事初天下徵稅由里民自貢遇盜襲綱者十其八九小民斷肱破踝號于道公以狀聞免其役著爲令重困以蘇又浙當倭寇爲患撞唐四出方有竦才藝兼優者爲之綜覈明敏以靖地方而公正精強力固克堪厥任旋以大臣薦遷湖廣副憲未任而公卒矣嗚呼公生平出處大節如此假超次以陞爲天子輔功業正未有已者惜乎其不享遐齡也公于方爲良人裔父璞贈承德郎母吳氏妻黃氏俱贈安人公攻春秋有獨得不事穿鑿爲文醇而古其卒也時在浙夫人黃氏歸其喪葬于塔溪銘曰

公子母少別必拜遠役涕泣而後行洎乎沒也廬于墓哭之慟墓爲產芝嗚呼爲人子如公可謂賢矣矧出入均哉

讀廬太僕奏疏存稿弁言

侍讀學士南昌人彭邦疇 春農

吾師廬容菴先生既歿之十四年次孫星垣哀公奏疏將付剗劂以予待門墻久囑弁一言竊惟古言官必其識足料數十年之後明足周數萬里而遙發端甚微所關甚鉅乃能弭患於未萌公以風霾示警一疏受知於仁宗睿皇帝今猶膾炙人口茲讀全集嘉慶年間嘆夷入覲使

臣無禮公抗疏請責通事援蘇軾陳希亮事證之時

國家示柔遠之經赦其不嫻於教訓廓如天庇覆之量故未施行夫通事何漢奸也夷人無引導之者何敢傲慢若是設當時在事諸臣知公此意防其出入示以嚴威何至今日有定海失守之患哉公於河漕錢穀俱有章奏獨此一事所關甚鉅故揭之以告讀公集者

盧太僕墓誌銘

協辦大學士 湯金釗 浙江人

君姓盧氏名浙字讓瀾一字容庵江西武寧人曾祖欽文祖全萬父宏達並以君貴贈通奉大夫太僕寺卿加二級曾祖妣朱祖妣陶妣周繼妣王俱贈夫人君生而穎悟稍長矢志力學慨然以明經衛道爲己任年二十二人泮旋食餼戊申登賢書舉孝廉方正弗就己未成進士授戶部主事洊升郎中補御史轉給事中遷光祿

寺少卿視學河南歷通政司叅議內閣侍讀學士通政司副使至太僕寺卿君爲科道時巡視濟寧漕務漕船抵通早四十餘日人以爲奇君曰此無他俾軍民有官如無官勿生事而已林清之變搜捕餘匪累及無辜風沙示警

詔求直言君請禁緝捕擾累以安善良得

旨嘉獎爲學政時肫誠懇勤與諸生論文必兼講學以六條訓士曰立志曰謹身曰勤學曰文行同符曰義利一貫曰感應不爽又作十字箴曰存理遏欲惠迪吉從逆凶一時士習文風爲之不變任滿旋京奏請以湯文正公從祀文廟得

旨允行君性孝友喜施與而自奉儉約嗜學無他好精研易

義深契於心著有周易經義審八卷周易說約一卷讀史隨筆二卷制藝一卷散體文五卷爲學須知一卷行於世公生於乾隆丁丑二月二十三日卒於道光庚寅七月二十七日年七十有四德配王

誥贈夫人先君卒側室熊以所生子鴻翹官贈如劄子五鴻翥河南候補府經歷定機早卒鴻翹道光丙戌進士由庶吉士散館改刑部主事鴻翔鴻彬俱監生女四孫五曾孫一將以 月念五日葬君於龍腹朱家嘴子山午向王夫人原葬新塘今遷祔是山與君合墓余與君同年進士鴻翹又余典會試所取士來請銘不可辭乃爲之銘曰粹然儒者深於易遇事敢言民被澤貽穀更資內助賢同勒貞珉永無斃

追葬鷺渚阡

邑人張望 閩楊

順治元年我師大破李自成於山海關自成棄京師西走明年夏餘黨寇南昌之武寧安樂鄉余公紹高禦之於牛頭峽敗死先是英王逼賊至九江後營總兵金聲桓請收江省自效王乃北旋已賊黨數千人從閒道犯縣聲桓未入南昌而都御史曠昭懷鼠首仰郡息不得城陷縣官逃賊然公解剽而去公本以匹夫雄猛有膽畧爲鄉勇倡初偵賊旦夕至號於衆曰比覆祖宗三百年社稷國破君崩亡命走此再行披猖願與公等甘心此賊一口應曰諾遂帥土團牛頭峽峽甚隘斷木爲柵死守賊不得進首縣城下之既而出不意反攻牛頭峽躍關而入公與衆人殊死戰不克遂遇害是役也死

者相枕藉賊焚掠聚飽村里爲墟由公而傳四世而鳴珂始爲諸生憫公捐軀寇虐亡骸無所歲時寒食曾不得子孫一杯飭酒塚次杳杳綿綿游魂罔寄必有饑愁冤憤而不克信者於是公之死百三十年爲乾隆三十九年二月庚子乃始制服范蒲爲身爲位招魂而葬之鷺渚壙於辛丑墳於壬寅碑於阡以振厥烈張望序其由而文以弔之其文曰嗟夫斯民不幸當大亂之世父不能保其子夫不能保其妻兄不能保其弟一旦皆裂頰張奮臂大踣以築仇人之冑而死者何可勝道方其大盜撞唐四出朝廷徵所在雄兵貫將蹙方面以制其死命而殘敗無主之餘曳戈潰散流亡邊鄙鄉里無賴桀黠積延頸有隙陸梁恣睢以快其氣又應乎茅屋之下於是巖邑大都當天下之要害固已焦朽糜爛而無遺至於荒谷冷縣舉豪傑所不爭民生無外事百年老死不見兵革之憂破敗立至草薶而禽獮之怛怛然孤兒寡婦之痛徧百姓家矣武邑僻在巖穴當公之際丁國家傾覆預蒙四海之大難及

聖人出而天下平山中之民安安而卧由由而起木石之與居牛羊麋鹿之與遊無由爲牡門夙戒雞啼狗吠之警蓋已數世而百年子若孫庇其庥澤而當日之駢首蹈禍僅若蚍蜉蟻子之性命焉者獨何人哉予方欲詳二
年之事與公之生平而歷世既遠老成衰謝而不可得及覽縣志而知與公同舉事有公之族尊大其人而已嗚呼尊大其尙能自全公奮不顧身以殉一日之急以

此而死亦以此而晦百歲餘之後也又卒以此發其光而傳夫豈非千載之遇耶而吾以徵賢烈之不可無後而又嘆詩禮之澤之不可一日不浸灌於天下也久矣
新修武寧縣志書後

太僕寺卿盧浙容菴

道光三年邑侯陳秋河先生奉中丞程月川先生通檄纂修邑志幾閱月稿本告成乃錄取凡例屬邑諸君子與志事者合詞郵書京邸以諗予而使序其後書中具言陳侯履任二載政治廉明百廢修舉如

上諭亭

文昌宮

學宮正誼書院侯至皆輪奐一新

鄉人士服義從風靡不趨事恐後而正誼書院與育嬰堂十鄉樂輸且不啻巨萬此志書成四十有四卷卽將集費開雕矣予覽之不禁欣躍而於鄙私正竊有用爲

感慰堪共白者中丞學問經濟悉本先儒所至於教養諸政無不實力推行其成績已見於嶺南集山左中州諸集矣予提學河南時中丞爲方伯相與言政事文章甚洽嗣中丞開府粵東旋遷山左嘗上疏言山東直隸水利特以書寄質於予予爲詳答殆千言且曰三代以下井田不可復而溝洫之制則斷不可不復中丞甚韙之未幾遷撫江西瀕行過臨下問予曰先生以教養爲政安往不得顧吾江有敝俗唯溺女爲最當事者亦屢經飭禁近稍息矣而猶未盡今先生以大賢居高位乞留意問曰有育嬰堂乎予曰有之然不可恃大抵經費不足皆具文耳中丞領而去尋聞中丞至江卽有溺女之禁今者吾邑育嬰一堂十鄉皆有輸助私心竊計毋

亦陳侯與修志一事同受檄於中丞竭力而奉行之者乎此予之所隱慰者也抑予於此又有惜焉昨者二月初吉中丞奉

皇上新命辦理直隸山東水利矣前數日閱邸報吾陳侯亦以中丞簡調

奏請遷臨川矣幸矣哉此志之輯業已有成卽中丞暮月之間已著已可之效方今

聖天子在上厲精圖治慎簡賢良所願繼之者於吏治民風教養諸政皆實力講求而吾邑人士於陳侯所修舉慎始敬終永永無廢至於是志觀來書及凡例別類分門悉遵憲檄其間星野沿革古蹟等邑前輩余盛諸公幾經參考歷詳舊志今皆仍之名宦人物儒林文苑善士

列女藝文傳記序及雜著古近體詩等應有事增益者陳侯皆秉公甄核無濫無遺於戲善矣予不敏繫官於朝雖不克與邑諸君子從侯之後共襄斯盛猶幸數千里外不我遐遺使得殿言志後有榮幸焉乃爲書之匪敢言序庶以誌吾桑梓關情區區欣願之素藉手以復於陳侯暨邑諸君子其可耳

錄車孝子

程銓

車必秋武寧人莫詳其先世父亡母老矣家貧與人客作蚤起執爨老母異糗肉食畢然後如其主家及日中又至亦如之垂三十年未嘗一宿五里外也母宿故無帳幔山蚊夏厲不得眠必秋就牀扇之俟母睡酣然後寢冬則爲之溫席雖敗絮母殊安也無何母卒哀毀骨

立枕草於地三年不改葬母其父隴酒肉位父母陳設
勸啜如事生然除夕荷薪一束詣墓前燔火獨坐達旦
謂之陪歲遇大雨雪則先結茅爲龕卷伏如蝟山下人
望火光競喧傳以爲笑今年四十有奇矣行且老貧益
甚人竟無有知之而恤之者僻壤窮民不讀聖賢之書
不求譽聞於世而事父母與純袴異其亦得天獨厚者
歟然吾聞歐陽子云惟爲善者能有後如孝子者其食
報固宜如此耶

書錄車孝子後

程鏡

車必秋事母孝無有道之者閨榻至來軒傳曉春行三
十里以必秋告兄茝房錄其事閨榻如南茶將訪必秋
拂席豆穀以待聽濫句而不至夜夢母拊之曰張先生

至南茶爾何不往見耶必秋執其手大哭而醒遂坐達
旦來奔必秋自言思母恐不安祝夢勿得嗚呼異矣

新修縣志跋

贛州府張紹璣
教授

道光壬午歲 上憲諭修江西通志及洪都書院育嬰
堂繩金塢等事邑 明府陳公秋河先生集各鄉紳士
謀之無不踴躍從事惟通志一項必先修縣志乃足以
資採擇復發格式各屬分門編輯慎其事所以重其書
也吾邑志書 梁明府編輯後越今四十餘載其間應
行增入者頗多爰設局正誼書院 明府總其成折衷
可否一秉至公同邑諸君子各分其任予適奉檄委署
贛州府教授未獲共襄其事次年夏卸事旋里大綱已
舉予亦間叅末議互相校讐稿成申送 府憲核定將

以付梓而各鄉所輸經費不敷艱於籌辦 明府與諸君子命予爲主修予出六百餘緡應之上舍余君相復以三百緡益之而志乘適觀厥成矣是役也經始於癸未仲春告成於甲申季夏門分三十有二卷分四十有四計字四十一萬三千有奇釘成一十二帙拾遺補闕有善必彰美哉徵文考獻之資其在斯乎予竊以爲馮志值兵燹之餘典籍散亡未免簡陋鄒志雖燬而蒐羅廣博考覈精詳良費苦心其藝文一帙悉經余盛諸先輩洵潤以成實爲志乘大觀後之修志者斟酌損益足稱完書武雖褊小人文不盛於他邑而覽志乘者未嘗不嘆有本有文足以信今而傳後也道光四年七月既望謹跋

蝦蟆神辨

署贛州教授張紹璣 渾齋邑人

道光己丑秋七月予族姪松園以湖南沅州協鎮進京引

見越數日署中忽有一蝦蟆重數筋踞案上皆駭之命畜之池不見次日又伏內室笥上目光炯炯有霞舉之勢遍詢父老僉曰此江西福神也入其家必祥性嗜酒且喜聽戲乃設香案具酒殽召梨園演劇侑觴飲酒可數斗醉時見歌聲入妙輒起舞咸目之爲奇焚香跪拜尋松園南旋甫抵鄂城卽奉

命遷陞廣東潮州總鎮便道歸里爭告之信爲祥瑞之徵予竊以爲不然古有功德於生民社稷者載諸祀典歲時致祭所以崇德報功非藉以邀福也自感應之說起人

網人紀所謂庸行者置焉弗講雖鄉間土神淫祀必齊戒沐浴不辭跋涉不畏艱險披髮草履稽首於土隅木偶之前稍得順意輒以爲神力扶持非關命數而婦人女子爲尤甚蝦蟆蛙之大者也又名蟾蜍名老蛤名田雞皆蟲類也馬援傳曰子陽井底蛙耳妄自尊大莊子云井蛙不可與語海蛙固不足掛人齒頰矣且嗜之者謂其味美用以佐盤餐宴賓客吾邑南鄉大者甚多人爭食之彼固謂能降福於人也使其生於南鄉見者取而烹之蝦蟆欲自保其身不可得矣烏能降福於人耶吾聞天道福善禍淫又曰皇天無親惟德是輔孔子云獲罪於天無所禱也天欲禍福人神雖有靈不能與之抗其他何足道哉乃好媚者邀福於神不止併邀福於

一蟲而以蟲爲神焉則惑之甚者也今沅州蝦蟆未知何在倘仍踞署內惶惑人心予將親往面叱問其果操何道使人奉之如神若是蝦蟆有知應慚愧無地消沮閉藏之不暇矣爰構此以辨之願世之好媚者共解其惑焉

重葺縣治前明先僉事石坊引

訓導方觀

吾方氏自宋遷武於居爲古其仕宦品秩紀於家乘而世遠事湮無徵莫詳至明吾支叔祖雁里先生以嘉靖乙未登進士第授刑部司旋奉特命決張延齡重獄復奏免里民自輸移吳鎮漕兌於豫章民困盡蘇後以倭蠢調餉軍糧積暑成疾而卒進士之有坊常典也公原不以此重公少時居家以孝稱於鄉里親喪廬墓三年

故達而終能忠靖王事夫武寧之定縣也始於唐前者多進士矣後者亦有人而公之坊獨中官城而豎之於縣治之前蓋不特崇祀鄉賢而當年

朝廷之重公榮公者已大有在迄今二百五十餘年邑之人無不望公坊而頌公矧其為同支合族之裔顧可聽其風霜雨雪崩磔而不顧哉乾隆十四年於曾祖稍為補葺今復集族之人而商厥事咸不以家計辭難踴躍樂輸觀爰為之引以弁其首

跋先僉事石坊記後

是役也責將安委於修葺先塋後同宗不以貧難復樂順從投牒新舊縣尹皆盛意褒嘉及期興工而在城親友視如已事所需架材藉用諸物隨假隨應米鹽薪酒

且代墊而先即至坊下小肆亦羣煮茗以餉石工往來行人繞道迴避類欣欣均懷必成之喜若有不能自己者嗚呼果何所為而出此也巨石數千觔下上若鴻毛不五旬而事舉而又適逢吾友余君主講正詣文而記之刊嵌坊石之間自今後數百年當必有繼起而任之者觀謹拜首書後

惜字會引

邑舉人葛利賓瀛臺

蓋聞鳥篆蟲文精英洩乎宇宙金章玉牒祕奧授諸神靈攬勝搜奇瑤華啟秀連篇累牘汗炙流芳價彌重於琳琅光直騰乎奎壁乃自雲箋擘繭露汁研松鶴眼誇藝圃之田龍鬚執管城之友驚鴻舞鶴共侈臨摹勒石鐫梨爭豪印刷縱牙籤錦軸寶惜不乏名流而斷簡殘

編污褻類多庸俗泥滓蠶塵之內楮片飄零窓櫺几榻
 之間墨痕溷雜每當觸目益覺傷懷爰解餘貲用聯勝
 會聚蠅頭之小費收蠹迹之遺灰編黃竹以分儲遺褐
 衣而徧覓不須問字何嫌曳白之文可比聚珍仍是生
 香之墨觀風前之片片笑捻江花尋雨際之零零細拈
 鄭草遂覺雲烟落紙呈彩色於當前好憑爐鼎騰輝煥
 文光而直上儒生豈談果報恍續杏壇薪火之傳夙夜
 堪對聖賢庶申章水瓣香之敬

武寧縣志卷之四十

藝文詩

古體

宋

贈鄭郊

黃庭堅 分寧人

高居大士是龍象草堂丈人非熊羆不逢壞衲乞香飯唯見
 白頭垂釣絲鴛鴦終日愛水鏡菡萏晚風凋舞衣開徑老禪
 來煮茗還尋密竹逕中歸

山谷年譜元豐六年癸亥十二月先生自太和移德平鎮
 蓋是歲歸舟自湖濱入修江由武寧而至分寧其贈鄭郊
 詩蜀本詩集注云山谷有荊州為興上人書此詩跋云癸
 亥歲予解官太和過武寧聞清上人當來延恩因謁鄭子

通問消息詩題子通之壁草堂鄭郊處士隱處也云云予家所藏舊本如此老禪謂延恩長老法安安死於元豐八年山谷爲之銘則此詩蓋是歲經途所作見山谷集

按鄭郊字子通此詩山谷過草堂訪靈源消息時作也山谷集詩題但有贈鄭郊三字舊志載同靈源過鄭山人草堂者誤又訛鄭郊爲鄭文今從本集訂正

黃龍清和尚真贊

黃庭堅

黃河徹底凍白髮通心白雖有顧陸手百巧畫不得

寄清老三首

萬山不隔中秋月一鴈能傳寄遠書深密伽陀枯戰筆真成相見問何如

風前檄攬星宿落日下桃榔羽扇開昭然堂中有相憶清秋忽遣化人來

騎驢覓驢但可笑非馬喻馬亦成癡一天月色爲誰好二老風流只自知

以上見山谷集

武寧道中

韓駒成都人

小灘嘈嘈大灘惡朝行羊腸暮鹿角盡日拖舟不得前忽然纒斷千尋落上梁左側石子多兩舷與石鳴相摩臥聽舟師倚篙哭將如二十四灘何

按駒字子蒼紹興間自館職斥宰分寧縣時作也子蒼館中詩有黃葉句最爲世所推云

武寧有酒罇短頸寬腹漆其外戲爲短歌

此君少日青而矐邇來黑肥如瓠壺縮肩短帽壓兩耳無乃

戲學騶侏儒人言腹大中何有不獨容君更容酒未須常要
託後車滑稽且作先生友少陵匏尊安在哉次山石臼空飛
埃茅檐對客夜驚笑麴生叩門何自來老向人間不稱意但
覺淵明酒多味乞取田家老瓦盆伴我年年竹根醉

三溪

行人 尹 恕 安 歲 司 人

三溪溪水別原委長日波光蕩無已曲折有如九迴腸合滙
門前清徹底只看秀色照眼明溪上閒遊不倦情何年得作
逋榮客好結芳鄰一濯纓

書堂山

結屋清幽推第一蒼山重疊翠如織書聲夜半撼奎星報國
攄忠多踵跡總邀霽影開鴻濛竹色清涼入簾櫳當年藏書
人已遠我來猶一望餘風

枇杷峰

青峰高聳接雲天邈迤不斷復盤旋上有枇杷垂清蔭競說
其下有牛眠昔時人往不可作鬱鬱青峰長似昨我從今日
一臨風百年之間徒漠漠

補遺

次韻叔父夷仲送夏君玉赴零陵主簿 黃庭堅

田竇堂上酒未醉已變態何如東陵瓜子母相鉤帶富貴席
未煖珠玉作灾怪茅茨雖長貧終有懿親在丈人困州縣短
髮餘會撮居然枳棘棲坐閱歲月代青雲已迷津濁酒未割
愛簿領能無休何啻喚魚菜羈旅苦地偏江湖見天大萬里
一帆檣長風可倚賴因行訪幽禪頭陀煙雨外

見山谷集

(元)

太平山襍詠 二十二首

極高明亭

揭傒斯 豐城人

太平最高峰 署亭更瀟灑 一作著亭 但有日與月晝夜繞簷

北極山

雲歸樹繞環 雨餘山更淨 長嘯天地低 引手捫斗柄

龍井

井水深莫測 甘冽如沆瀣 一朝螭龍起 霖雨滴下界 一作澤下界

龜山

浴水載書出 化為碧孱顏 堂堂富川郡 永鎮東南山

鶴山 一作鶴皋

仙人出未還 老鶴惜 一作無伴延頸待 一作東舉山不知日已

晚

枯槎溪

枯槎大幾何 泛泛此溪渚 會乘天上去 殷勤問牛女

雲旗峰

天風西北至 獵獵動雲旗 却訝西王母 瑤池晝下時

雷巖

空巖發靈籟 彷彿如風雷 只宜函寶劍 天遣六丁開

三仙坡

坡上春雲白 坡前瑤草長 仙人三十指 曾此采幽香

榔梅 一作構梅

少年武當至 寄此南枝春 歲歲滿 一作樹上花開遲 故人

花開好
故人

義櫟

異根却連枝欣欣更榮發詠出一作山中人此義良一作真可

法

鹿跑泉一作虎跑泉

山靈驅猛獸跑一作抱出一泓泉流作人間去還為大有年

五雷峰

烟雲常黯淡時護五雷峰忽爾雲烟散撐空翠萬重

龍門

石門高幾何自非神禹鑿有時龍忽歸滿山風雨作

孟姥潭

何年孟氏姥照影石潭底姥去不可追至今名在耳

獅子巖

愛此獅子巖宛若獅子踞忽然一咆哮清音滿天地

梧桐岡

梧桐葉初凋高岡秋瑟瑟鳳凰飛去來月明如白日

葫蘆石

睽此石葫蘆不隨草木壞誰能剗其中納此大千界

虎跡石

茅君騎虎來石上遺虎跡豈無莓與苔自是不敢藉一作蝕

豹齒石

白石亦何堅文豹來齒之齒之痕尙在無乃神所為

石人洞

陰洞有靈藥不知幾經春年來荷鑪冶一作年來化作石丈

仙跡石

仙人赤雙脚踏石如踏泥泥痕尚可没石痕不可迷

按揭後斯字曼碩與楊宏虞集范梈為元四大家舊志僅錄十二首又訛亂其姓名今從本集通志互考訂入

繇海昏入武寧道中

范梈 清江人

登高勢欲墜踰險心始領戒想適其恒經過何由騁洩雲行
崦彩雲落浥澗茗元蟬振山妻皓鷺團沙整久盼歸舟近况
懷垂釣永豈不畏巖程無因攬流景烟霞蘊至樂歲月啟深
省百丈有幽期眷茲心耿耿

白雲篇

僊巖老人

翹首空巖下徘徊望白雲仙人不可見山風吹我寒石路何
齒齒石溜何潺潺來者難拒絕去者莫追攀委心於巨壑樵
歌入耳繁

明

遊魯溪洞歌

通判張翼

天開魯溪洞呼噏吳楚間龍菴映草樹菴藹羅峰巒蒸雲飛
甘雨流水興層湍豈無神物護疑有龍蛇蟠我行屨徂暑履
畝良苦艱居民頗古樸導我陟巔岼肩輿入窈窕應接開心
顏苔楸落斑駁瑤草翻朱殷鏞鼓答幽響龍象相迴環石田
分十二一一長琅玕下臨千仞淵江漢通潯浚因之坐終日
頓忘塵外喧清冷颭天籟忽欲灑雙翰命酌歌短什飄然出
霞烟茲山信奇絕造物妙無端仰天發浩歎雄劍鳴珊珊

東溪兄搗酒過黃厓書屋

儀賓余弼 柳溪邑人

有客叩我門手攜玉壺春爲言長相憶慰此骨月親多謝丈
人輩爲我誠殷勤列坐倚幽竹剥棗雜餘珍觴行輒復飲安
知有主人談笑共真切誡諧出垢塵高林華屋蔭爽籟清風
生追隨出門去山氣轉分明因思謝好爵偶爾還躬耕苟免
生前辱何事身後名

田家

早年不省事遂爲簪組慮顛倒七八年餐嚼無好味誤落塵
網中欲去不得去結駟與連騎僕僕風塵內田家有美懷榮
辱無所繫松竹蔭邱墟好鳥來上啼老少羅堂前不識官與
吏自種還自穫食之終無媿誌歷不解數日月何曾記厚薄
從所願取樂皆真意甘肥難久居吾當知退避

賓陽山齋讀陶詩有感四首

勞生非所欲盛滿難久延嘉彼康惠心勉旃成自然尙友千
古人能達經與權後來向道者得之終成偏在昔頗奇僻莫
知方與圓每懷山中念欲買柴桑田欲之不可得恨無萊婦
言二仲旣以緬遂爲塵事牽

鬱鬱秀孤松託根於此中時時接天籟日日響清風自言歲
寒盟不與華姿同上有千年鶴下有絲苔通

漪漪窻下竹獨向堂前青歲歲經霜雪無辱亦無榮不入羣
芳伍高節由自成清風脫然至君子來好音

青青堦下草汝生亦何好亦匪爲酒漿亦匪爲珍寶服之不
療生佩之不成道蓬蓬覆我堦營營令人惱霜露未曾秋哀
爾先潦倒

歸豫寧別業

浮生常慕百百年終有盡何用苦奔趨長懷憂與悶汲汲功名士不辨鄒魯訓嗟嗟隴斷人乃爲銖兩困所以南陽賢終不長尺寸桐江千古師彭澤百世合託身與道俱庶幾能順命

五月朔後一日偕魯江諸君自寒泉樓歸賓陽莊

溽暑揮塵襟市廛寡所諧巾車出北門珍重更裴裒眷言息所憩幽徑日夕開蒼松響天籟翠竹交予懷中有好鳥音爲送清風來

堂下竹

幽竹抱清况不爲時所移風雨自顛越中有平安枝於焉見高節直哉懷素姿冷冷空齋內相對常依依堂上我爲主堂下爾爲賓爾賓誠不惡可以滌吾塵

魯溪洞吟

邑貢 余長祚 見南

魯溪之山高且深魯溪之洞何太奇大者爲堂小者竇萬竅互達無窮時玉乳上承或下垂五色蔚繪光陸離亭亭瑤桂間罽恩復擬猶龍及踞獅幢幡鐘鼓影還疑石田井列孰經畫當年種玉今不移張炬猿引歷鳥道應接不暇驚殊姿顯厓奔出地無底絕頂倒漏天如規萬古應留闕靈怪咄咄鬼工奚所施幽泉琤琮透石罅龍湫掌大猶停卮對面一線不辨色尋源白晝風雷歎興來鞭石欲渡之更願攜家向此住日與仙人攬六博餐五芝倏忽叱將羣伏起青牛紫鹿相追隨再來却爲桃花誤武陵漁人安足師

修江別業雜詠

先大夫爲賓陽莊時有八景詩與客倡和不肖童時侍杖

履先大夫語之曰茲地不必勝景不必備顧披棘葺宇種
樹穿渠平生心力頗瘁於是小子識之先大夫捐館舍距
今十年語在不肖耳宛如昨日爰本舊意間有新增目凡
二十詩亦如之匪敢希蹤輞川之詠抑冀大雅君子不吝
裴十之和云爾

目盼青桐柯虛堂滴寒色對此千尺材元龍無氣魄

雙柏堂

空翠撲幽亭搢頤坐忘暑仙人來有時嗒焉亦無語

搢頤亭

風起秋山空片片白雲墮齋中人不知北窻但高臥

自怡齋

斯人百世師遺榮任蓬累臺上有青山臺下有流水

高風臺

山雲昨夜雨水面平如席朝來霽景澄林光弄深碧

北渚

誰以青芙蓉幻作金屈戌中有餐霞子時乘雲氣出

南屏

人道千尺深萬尺那可測不信有龍蟠試看雲五色

靈源

抱甕出深林爲園學漢陰紛紛桔槔者寧識丈人心

午河

茲塘名自古王公何代人不知吾與爾千載定誰真

王公塘

培塿狀類螺小大紛相糾試看把栢時居然落吾手

螺山

修篁闕白日宵映霏晴雪薄暮天風吹高樓玉笙徹

筠雪樓

相傳白鶴仙此地騎鶴去翹跡企青冥雲螭倘可馭

遲仙嶺

晏坐淹晨暮戀此禮樹林何如行路者不擇惡木陰

禮樹林

古松不記年蒼雲晝漠漠獨自繞林行四面金粉落

松花塢

未有此堤時車馬跡如掃今日堤上客紛紛事幽討

來賓堤

野迥四鄰寂周遭垣作關祇應護松竹仍不礙雲山

短垣

湖風蕩綠波臨流快於剪棠棣歌相和東南宴仍展

二難湖

斗酒不自勞伏臘邀鄰叟直以願豐心長令四海有

豐社

攜客半林遊行懷深不怨一醉灑松風我眠卿且去

憩石

大邑系志 卷四 藝文古體

臨流置片石日日擲竿坐貪看江上山不忍爲魚禍 垂綸磯
憫旱行爲范合君作

君不見去年赤旱百餘日萬落千村半空室今年盛夏魃尤
虐八月炎風雨尙闕修江流斷井泉竭夜夜轆轤聲不歇沙
邊乾雀乾欲死畦巔枯樹禿如指田成十字盡龜文四望紅
爐野火焚東鄰老翁年九十說此窮愁生未習西家寡婦仰
天哭孤兒牽去換新穀范君范君何其仁倉卒下車纔及旬
剪爪犧身坐待旦洗滌狂狴秋回春油雲未應桑林禱蒼赤
胡能格穹昊代民請命緩誅求遠室旁皇中如擣衙前群吏
類饑烏堂上冰心注玉壺我有賢侯真足恃不愁彫瘵不全
菴

山齋中秋夜不見月

商飈挾山雨虛堂生暮寒浮雲蔽清魄徘徊空夜闌吟蛩依
壁底似發幽人歎履滿昔所戒盈虧數恒安詎得古人存千
齡與俱看瓜果佐壺觴聊適不爲歡榮悴感物理明晨且加
餐

豫寧山莊寄答豫章諸游好

商飈蕩林杪萎葉辭其枝豈不戀故條飄散固有時余本巖
阿士寄跡東城隈門多長者轍知不厭茅茨比返邱園臥軒
駟絕追隨俯鑑清泉流仰睇浮雲飛良夕坐澄景悠悠想風
期古歎靡遺棄尺素仍相誦努力問加餐殷勤託新詩焚香
長跪讀宛若觀光輝歲晏冰雪繁山中安久羈擬飭青翰舟
凌寒泝流漸預假晨風翼薄言寫中懷執手旣弗遙毋爲心
煩悲

雞鳴山

邑令潘

潛銅陵

留室尚清虛至人多隱居飄飄衆仙子何處覓霞裾

九宮行

侍郎朱廷立兩崖

嗟乎九宮山高不知幾萬丈神鰲移來自海上天地東南有
偉觀鬼琢神彫誰可狀千崕萬壑何巖嵒東與蓬萊相並雄
至今海上羣仙會共羨中原有九宮兩崖仙人頗好奇登賞
每與茲山宜天馬爲我吹陰翳白日爲我開心期捫蘿振袂
歷茶寮古廟丹青鎖寂寥飛泉噴雪萬仞下而我髣髴聞風
潮穿林下坡復上山兩峰離立爲仙關凡夫到此不敢上恐
驚天上嗔人間歸雲橋轉萬竹連石屋雲關生翠烟側身已
覺不在地仰面長嗟直上天當關巨石誰可關云是仙人試
劍石石上何人更作亭奇字殘碑猶可釋千盤百折到宮門
怪松倒石驚人魂向來他山望不極爾今眇小如兵屯巒迴
徑轉忽平衍雲間隱隱聞仙犬羣峰環抱中如林直造壺天
興不淺道人相見樸且野無乃桃源避秦者陶姚仙跡日在
眼花木當窻秀如岩東溪西溪襟帶流龍嵯虎嵯佳氣浮地
高鳥雀不得過潭光隱見蛟龍遊入夜仰天天氣澄撥雲峰
頭斜月明明日山下人傳說昨夜滿天雷雨鳴吾聞真人昔
棲此解道談元得宗旨奎章遙下天子庭遂使茲山遍金紫
真人乘雲不可尋蟬蛻猶存香火深謝公詩句天下重我輩
疎狂時一吟鳳凰山駱駝嶼青猿洞白龍井眼前俱是空中
景會須揮灑瑤瑤篇景物文章共馳騁君不見周子著書南
嶽側七十二峰皆變色又不見晦翁鼓檝武夷濱九曲之水
皆精神

古柏歌

盛宗齡 長庚邑人

先祖手植廳前柏縹緲雲端高何極霜皮栗栗幾經秋百尺
常有好顏色虬枝結屈巢元鶴恨盤厚地深莫測昔時雷雨
瀆大野云是蛟龍之窟宅至今父老戒剪拜摩挲其下思遺
澤我來窮冬益濃華黛蓋參天攀不得如此喬木國之珍賢
宰憇此終愛惜君不見武侯廟前古銅柯杜甫歌聲出金石
按古柏盛東民植見古蹟

國朝

看鶴亭二首

邑令 馮其世 雲夢人

一室撫鳴琴守官閒以清每憐雲月好上看鶴亭
顥顥江天遠遙遙秋夜月攜琴坐石上有羽如飛雪

烈風吟

蕭露灑 邑人

戊辰四月旬之七陰風慘淡迷天日拔木發屋山動搖九村
十村悲無巢山口居人禍最烈瓦礫空飛棟宇撤老者抱頭
死溝渠少者翩翩隨鷓鴣風定之時問生死須臾殞滅三百
指殘喘尚有十一人血污口鼻辨難真其餘生者亦落魄求
死不能生不得屋旁合抱十株松飛入修江走虬龍吁嗟箕
伯何太慘餘威數日地猶撼此變不紀人不知氣結嗚咽存
吾詩

按康熙戊辰四月十七日山口張氏遭風變見雜記

戊子社日泊署志感

盛際斯 邑人

昨宵雷雨驟石尤激郎當飄飄遊子舟可憐泊何方此日天
少霽遠山喜欲朗南村雨已足農房社酒香晨風吹柳線片
片作雪颺桃花落殘紅蹂躪成濫觴景物望中變何堪繫遠

正軍集卷之四
鄉有子纔九歲依依立我旁頗畜男兒志不思堂上娘畏書
如仇讐放曠苦無韜強之以句讀齟齬不上腔怒欲加鞭扑
還念在他那顧影自妻其父子只一雙安得長房術爲我縮
西江骨肉歌既見使我心則降

溪園瞰桃歌 傷蕭露懷

往年食桃君在門今年桃熟不見君猶憶及君餐桃處青燈
煒煒話殷勤果盡燈殘興未罷更呼酩酊酬清夜感嘆溪園
久寂寥至今唯有桃開謝兒童少小學婆娑醉向君前奮竹
戈君懷漶渺不可測對此爲之嘯長歌歌中欸欸洩奇理上
天下地無不紀滿紙低徊結氣深恨不移居作鄰里是時金
火初流中君歸西岸我亦東僊蹇長安幾度雪文章竟與星
月空朱顏碧髮隨年變桃花依舊開青萼金樽玉壘叙朋儔
復得與君園林晏座中心迹未遑論羣雞起唱各飛分豈知
電逝風雨絕蕭蕭寂寞無還雲使我對桃空歎息使我桃枝
空墜實秋蓬亂捲寒蟬鳴滿地青紅共誰食此園曾經學士
築五百年來我復宿桃子離離春復秋人生徃復如轉燭荒
林日暮風索索獨倚桃株自迴薄我亦衰愁多病人未識幾
見桃花落

春夜泊龍潭遇風暴

汪 瀾 邑人

雲氣上蒸起狂瀾黑風出洞吹沙翻雷霆戰鬪欲破石閃電
出沒光迴環鬚鬚澤上走百怪須臾驟雨崩危山老龍蜿蜒
出水戲童蛟屈曲遊嵯端天地之奇此一洩忽然月出心平
安舟師起立尙恐懼船頭拜禱初霽顏言此本屬龜鼉宅復
有蛟龍居其間燒紙點香拔篙起放船爭下東渡灘

送盛成十先生歸里

冢幸 甘汝來 奉新 避齋

憶昔侍側方燥髮先生揮塵清風發上天下地歸函丈語如
懸河走不竭使我心魂爲飄揚滿堂賓客氣象越手持一部
廿一史往來胸次若柄揭九月秋高泛彭蠡收拾湖光詩滿
篇詩成一嘯飛雲落蛟鯨顛沛不敢眠回首芝山已十春于
今復得事周旋先生齒鬢方康壯胡爲結念在邱園大都神
物難爲知先生於世終澹然窮通豈足累高人林下姓字古
今傳

按甘公遜齋年少時隨父任廣文父與盛同寅最相友善

宿三山

王世章 瑞昌 訥夫

山中氣候深秋菊已堪摘我欲登東臯一望陶潛宅白雲千
里深窮途未可測古人愛體素不受榮名役雖復重一飯事
往無留迹予媿柴桑人悠悠常作客

存吾園十詠

萬族共枯菴營營竟何施君築存吾園君懷更不疑人生靡
溜潔適意安其癡知者修要道下士或笑之石馬交茅屋千
載秋風欺雙林有瓊樹空聞故物悲看君堂下竹修修自成
籬停雲于南山悠然無與期半艦吾所泛松濤吾所吹天地
化爲海駕言已在茲

自寶竹堂發舟夜次巾口別盛季樂余大蛟

孤舟出巾口大河耿秋明蕭蕭蘆荻風送子東南行有酒不
能飲何以慰離情高天斂清氣坐對想平生夙昔愆世故結
髮事弟兄江頭候風色波瀾忽縱橫繁華誰家子走馬絡長
纓四海延泛愛酌血鑄深盟謂當保晨夕中道聞嘆聲頽流

日浩蕩千載汨其名與子結好來大義靡虧盈慨然望前古
獨立披榛荆而我為情累兒女悲中庭垂老當此別中懷紛
不平羨子雙飛去去去豫章城豫章好秋色文章應壯盛盤
寡與悲激索索難為聽嗟哉勉古道古道如埃塵賓竹有舊
約孟冬倘能信還當共君輩掃雪注丹經

伊山

邑舉 洪文機 柳菴

昔過太行側崔巍絕埃塵大氣含光化峭削幻鬼神我欲躋
其巔縱觀東海濱三山端可指日出如車輪及昨遊伊山高
與太行倫蒼穹疑不遠手可摘星辰跌坐叢嵯下所見只嶙
峋六合殊空濶胡乃苦逡巡一劍倚天外悠然悟本真

望九宮山

九宮崔巍如立壁東入青雲摩白日飛泉幽壑盡空濛龍湫
劍石尤詭喬中有陶姚洞最深宿雪千年永不失怪松縹緲
隔雲間天上三峰安可卽我嘗聞之思一往自恨此身落塵
域茫茫屐齒未躋攀老來拄杖空太息安得寫生有神工相
攜好絹到九宮為我圖此奧妙區一洗人間齷齪胸

中村春日大雪歌

山中一寒十日雪萬里蕭瑟行人絕飢鳥掠地不能飛老樹
壓枝全欲折圍爐拙榻不敵寒敲冰汲泉手欲裂兩肩上聳
氣如霧口呵凍筆有戰色且喜積雪三尺強已卜今年無飛
蝗出門狂呼語鄰叟何弗對雪開壺觴江南性命寄禾稼年
年秋收集旅亞上天降康會有時合備牲醴賽香燭

題字雲巢竹

翰林 李應熙 富川 屯菴

字雲巢畔竹歲久漸成束上枝拂檐榭下株穿堂足雲或時

一來夜傍竹根宿雲葉相因依濃陰覆一屋于埜巢其巔看
雲成一掬小簾面竹開葉葉上衣綠稚雲或待字潏然不出
谷細夏琅玕聲蕭蕭出寒玉

寄豫寧三盛

豈不惜離別此心難自由我身如浮雲因風南北流舉首望
青山青山阻以修促膝草應長新詩日以適不得與周旋相
思恨悠悠

吾家距豫寧計程三百耳相思不相見貧病累如此尚友古
之人古人則已死生平半面識苦恨異桑梓奈何素心士交
臂成千里與汝俱非少歡會良有幾倉卒不可諱此恨何窮
已

右見鉄甕集

登太平山過龍門作

邑令 鄒應元 金匱清源

石門如壁立縹緲出雙峰嵯峨開氣象峭削撐虛空猿雀飛
不渡雲霞長半封肩車陟永路仰見日蒙蒙碧水雲關來滄
浪滿山中風雨時間作隱隱有神龍曰余蒞茲邑卽政頗從
容每因事會期却與山水通周覽經數載得此嘆奇窮多謝
靈山力深嗟造化工宦情自茲遠賞心與誰同寄語山中人
應留二仲蹤

宿字雲巢

劍山何戍削劍水何幽清新雲與舊雲旦暮浴巢榭我來隱
雪榻獨坐理雲囊松竹闕清陰窈窕見微明高梧初月上深
谷寂無聲視聽歸冥漠方知靜者情

尊經閣

教諭 陳嵩齡 崇仁

武寧城北尊經閣爛然雲日迴朱箔千里百里縈修江千山

萬山列城郭花香晝永薰風來月色深繁霜落四時天氣
相周旋淵默內觀識真樂有經可枕玉可懷有史可鏡石可
斫玉枕石鏡空氣氲玉堂石室何灼爍五經高懸如五星滿
閣光華徹山嶠千秋烟烟此心同堯舜先我開橐籥閣上別
有天地在目前只看飛與躍

龍潭石尋古蹟

邑舉人張應遴 崑岡

龍潭之水深千尺上有蒼蒼之古石江流環抱勢孤危嗽浪
搖風無崩圻健筆文章常間作此地登臨久索寞蔓草荒荒
閱歲深巉岨古篆都斑剥我對斷文捫且推一二存者點畫
疑倚石踟躕了無得欲削老苔留新詩苔封石久無人拭摩
娑下撼風雷宅驚得潛蛟吐沫珠一洗寒厓千古色

虎爪泉

巖陽山下有清泉泉從石罅瀉潺湲石眼如篩滾滾出傳言
猛虎爪所穿虎爪搔石如搔土爪痕歷落今可數怪哉虎爪
縱能關何知石底涵清液尋疑此石久徘徊笑問清泉泉莫
白君不聞古有拔劍刺山根至今流水出劍痕

修水曲

盛 暮 邑人

乙卯秋予與蓉菴水賓自章江同舟歷建昌至武寧
逆上修水薺菴沿灘索詩戲爲此曲合榜人因歌以
助肩力

山何綿綿水何修修裂我羅絹十丈不周

五月躡陽節郎有萬里遊藕潭絲不斷淺沙難進舟

銅盆注溫湯爲郎浣妾容柘林綠桃花紅

送郎上馬郎馬不前郎下馬意纏綿

利刀欲破石三硤何離離折斷龍鳳劍生死莫相疑
山上松樹青江中鷺鷥潔妾心與郎心兩兩珍重別
細雨濛濛寒燈孤宿腹轉羊腸有如瀦石曲

妾在中房病郎在車頭好西風徐徐下使儂枯槁
南鄰煮豬頭北鄰煎鹿角火少水多雞聲喔喔

鳳口銜梧子飛飛楊柳路梧子西落悵然東渡

續修水曲

已未冬同薺菴買舟由武寧往寧州所歷諸灘薺菴
促予足之復續此曲

張家小姊妹短襦繡梅瀾瀾中有鴛鴦呼儂仔細看

秤勾何日直月光何夜滿抖擻寒衾更長夢短

密雲不雨新田荒燕鄰人擊年鼓仰天長呼

蘆陂有鳥比翼翔翔渠梁有魚比目徜徉

仙人臨江江濤孔沸濤高不得渡相望噓歔

昔日桃林影相攜三斗來今日春酒熟桃花又新開

瘦狗吠斜石阿郎歸何時寄語孫家姨爛柴難為炊

朝浣藍絹暮擷枸杞北岸有舟曰郎至矣

彭姑抱子出喜聞阿兄到儂整龍蟠髻門前有鵲噪

磨鏡理髮搖步上堂小神天神歡喜無量

按諸灘名或一字或二字或三字詳山水灘類其間又有

潭涯渚水互見云

馬山曲

桃樹千年碧萼蒲石相向仙樂空中舉白雲生惆悵馬山不
可上

山濤何啻勺中有龍石跨大風吹我去茫茫沙塵射馬山不可下

郎上馬山行李艱難嵯霜壁雪損郎容顏
郎下馬山激流潺湲馬首東向水流不還

山水雜言

予頗閒寂每好風日笠履所留意與相屬偶壽新名
罷以短韻撫拾星遺得二十章 錄十二章

開懷北嶺上但有萬里明天地皆渣滓吾心獨太清 明月嶺

莫挂黃犢角莫吟白石文後車去已久此音不復聞 挂書嶺

仙人羅雲田田注玉液飲之可長生相視三太息 羅巖

雪簾麗其左文魚隱其右中有河洛圖與誰爲受授 水文巖

我欲乘仙羊俛首不肯走且復置之去恐或汚其口 飲羊池

嶺下白風起嶺上白雲多鏡堂照不定萬岫揚其波 鏡堂嶺

仙女治粧罷倚巘盼仙童仙童遙相對歲歲怨秋風 治粧巖

閒雲尙徃復斷石臥荒苔當年歌詠盛芙蓉滿池開 度雲橋

幽房通高堂紆行行小巷但有仙梯在白雲自升降 芳谷巖

上有煑石樓下有棲真室邈矣避秦人四壁風蕭瑟 碧虬巖

石齒何齟齬微雲時吐吞霏霏玉屑下吹作桃花源 鋸崖

白石扃幽徑雲鑰何嶢嶢中有淨明堂夜半自解籜 篁山

拜雁里先生墓

先朝有雁里薄宦冷如水蓋棺止存骨歸墓苦無子墓制何
堅完淑哉唯內姒我爲停肩輿低徊拜未已石人眠綠草石
獸缺兩耳年年風雨寒蕭瑟楊花裏

遊黃婆洞

崕陰扁奧窟靈根隱蟠屈鬼斧鑿其藏怪象互紆鬱逶迤梯
磴台節節苔蘚齧中有蒼壁懸猿猿不可越巨石交暄濤書
夜縋素雪牙角怒噴沸雷雨爲變滅小立毛髮寒深邃復誰
測我同健遊人乘興窮所悅捫蘿躡層危跬步啟秘誦元景
遞參差出沒見凹凸幽叢衆籟發如聞太古瑟桃花笑避秦
潭兔憤口涅誰爲此清虛豁合心肝潔在昔窮曠士匿聲恣
奇穴願與諸君謀徒築搜芝蕨

仙人潭

呂昌言

邑人
雨文

維舟仙人潭潭水清且冷蕭蕭流水聲夜闌發深省
斜月照危壁壁水流仙鳥仙人去已遙潭水空千尺

豫寧雜詠二十一章

余騰蛟

邑人
善菴

山色四面來飛翠落亭砌春風送樵客杳然入無際四望亭

何年橋上月流此元鶴影好風相與來飄然過鹿嶺

看鶴橋

修水自西來中流此洄洑夜闌春雨過寒雲卷淨綠

洑洲

山色凝暮靄殘霞隱絕壁常有仙人來夜夜吹鉄笛

丹崖

寒泉漱石根屈折成地肺潛虬媚山鬼風雨恣幽憩

魯溪崑

昔人讀書處蒼涼鎖白雲掃雲汲山井冷然清心魂

柳山

一泓仙家水清風蕩寒漪寧遣山童汲莫使世人知

甘泉觀

丁仙多遊踪此地常棲托白鶴去不歸寒雲長漠漠

丁仙故
居

孤峯倚絕澗縹緲出天半長風四面來澎湃如欲亂

危濤峯

巨靈劈山骨倒落神龍淵明月墮寒影留客聽清猿

龍潭石

瑩然一片石女媧隨手插魑魅斂形影霆電來相狎

石鏡山

靖公說法處蕭條一草庵客到驚山鳥銜花過遠嵐

靖公庵

仙人覓儔侶乘鹿向白雲乃知塵外客亦復念其羣

紫鹿嶺

小築臨寒渚抱瓮俟時清祇今溪園內常聞秋水聲

溪園

淼淼修江側江水有清音古之傷心者長此抱膝吟

賓陽岡

寒雲落劍山偃蹇如欲息多謝巢中人造化生胸臆

字雲巢

邨烟遶青楓寒流下赤鯉爲問虬髯翁年年釣綠水

楓橋

爲汝豎高節風雨教人扶近來賓客少不應汝我疎

賓竹堂

結廬向南山山色濃於黛好風迎面來爲君起清籟

延薰堂

懸流一千尺白日鬪雷霆有時收萬籟故作環珮聲

宓羨洞

神工開肺腑鬼斧鑿幽隘臨流莫種花恐被漁人怪

燕子巖

遊靖公岷盛二子埜同賦

寒潭媚虛影鐵色走絕壁上有乍喧乍寂之懸流下有欲傾

未傾之怪石中通一線何微茫屈折低昂盤崩劣天半常作

風濤聲空翠倒浸衣裳碧危濤峰下望行人如蟻緣纜相絡

繹厓南數畝雜荆莽云是上人靖公之廢宅鐘磬剝落風雨

痕泥金古佛無顏色我友盛君好事者頻來取酒臥其下窮

搜幽討不知疲山風爭向懷中瀉酒酣一曲萬籟清舉眼望

天天青青厓前雲吐微茫月鷓鴣啼寒邨烟發牧童驅犢過

前溪千峰躩立送余歸

月夜泛修江

邑貢 盧大舉

修江紆滌七百里一輪皓月生流水扁舟載酒且高歌漁火

星光翻浪底仰視浮雲一縷過太虛洗淨無渣滓溶溶入孤

懷孤懷不可已漬墨濡毫灑灑瀛洲一幅丈二紙詩興狂江

風起兩岬松濤聒雙耳人生適意無時無那能水月清輝都

如此

長暨原

盛 鏡

秋日清且和微風謝炎暑散帶度平原杖策登遠岵巖曉若
造天峯嶺直當戶長棧繞雲飛曲澗穿岷江逕步欲窮源緬
陟情攸距時見山阿人逍遙下林浦眷彼視聽幽慨茲風塵
阻人生俯仰寬世路馳驅苦智者乘令時愚者懷樂土智愚
共囂囂誰能老山墅伊余寡通識少小思遐舉豈敢矜高尚
自顧慙伊呂至德不可幾榮名誠所忤曾無梁父吟於世亦
何補

巖陽山

谿初出大澤山勢轉紆阻峭壁干青霄仰眎神驚沮溪水無
安流石罅爭吞吐有時灑瀨高險激瞿塘怒趨棧環隈陟
嶺通林隴菰蒲覆芳洲蘭茝散平階飛泉落清池循流澹容
與翹首矚遠樵高蹤何踟躕顧盼越尋常風神復軒舉塵外
事已幽山中人自古猿鶴亦羣遊雲霞若爲旅平生念索居
東髮慕元侶欲買東臯田來構西山墅不見采芝人蕭條獨
延佇

建溪偶詠

榮光人所惜微空我亦艱私心懷拙想常以逸爲歡開田役
新功辛苦豈不煩學而時習之庶乃心性寬牽牛晨出野日
夕持入欄朝耕夕且歌功隙有餘閑戮力隴畝間亮無飢與
寒况有同居人骨肉相盤桓雖糜王子貴聊亦獲粗安

山中新晴喜明府鄒公見過

久雨農事荒新晴喜耕耨落日山鳥鳴淒清猶在目村童亦
不閑時時見樵牧春收已就刈濁醪應可掬忽聞君子來薰
風滿谿谷

谷中多佳卉黃薺味不羣能娛野人性亦與賢者分農務有時暇隴上看白雲白雲自往復縹緲猶爲君正爾可共歡逍遙盡良辰

山居清興除窮巷車輪寡豈敢惜芹芳未足酌長者初夏草木繁青華被四野展懷發新詠風情皆瀟灑嗟予隴畝民素襟亦自寫

窮谷懷新意悠然鳴素琴春華榮夏日疎爽鬱幽陰凱風何處來翼我堂前林清賞不在多一晤卽知音虎溪三笑後萬壑自悲吟

武寧臥病歌

吳東潮州

雨戰寒郵落葉蒙衆賓豪飲萬山空微軀薄暮蒸內熱頭懸胸塞筋骨恫盛暮罷酒顏色赤招醫煎藥燈花碧促膝窓前風颼颼夜半移我臥東宅紅爐大被疾箭注小兒依依戀我床投藥念我唇舌苦茹以鹽梅及冰薑隣家砮杵聲壯激簷牙薄雪空浙瀝有客手握紅唾圖貽我他年想歷歷神焦眼枯不敢覩謨來傍我曲折語耳邊枕席通石泉濯盡人間之泥淤嗚呼古來少年交遊多汝我如此如此能幾何速去呼童灑掃几上塵研墨索紙爲我書今日之病歌

流月池

趙由儀南豐

陰岬白日寒飛瀑散雲霧可惜水晶簾流向人間去

字雲巢晚眺

遠鐘生暮寒杖策倚疎樹山月在前溪樵歌不知處

題字雲巢竹

偶然隨春風作此猗猗色生意無逢迎素心自寒碧

落日漾寒翠自然生晚涼時見遠烟外流螢三兩行
夜氣始蕭索清商歸此君秋聲不可見微露月中聞
風雪空堂外珊瑚骨節鳴碧天淨如拭葉葉抱孤清

豫寧留別盛季子

江城二月春轍軻寒雨滑滑泥沒髀魚龍偃蹇雲氣驕旅愁
棉鬱不可破頗憶君家好花萼倏聞臥病成摧挫夢中丹篆
一摩挲紅玉火珠落咳唾天生斯人不泯滅會登玉堂備著
作杳渺元氣相扶持膏肓二豎避譙呵扁舟存問南城隈秉
燭開尊夜深坐病起雙瞳點如漆紫焰英英滿藜座微言玉
屑深復深天星散落光侈哆名理將無有鬼神糠粃已覺盡
揚簸丈夫意氣如雲山生計飄零有束縛十日聯床惜倉卒
千里春糧已裝裹驪駒在路僕在門會稀別遠心無奈殷勤
強爲說前期復恐青衫淚沾浣杜鵑花殘春欲過鳴鳩乳燕
聲相和此時哀樂難爲情願君怡神且高臥

黃婆洞

邑拔盛樂水資

懸崖啟兩壁突兀詎能平一水天際來驟若飛鴻驚無心相
感激聲響自然清層層石潭雨幽幽山鬼鳴白日不到處時
有春草生高樹結繁花枝條傍窅冥不剪亦不落萬古長華
榮仙娥旣已邈几榻但空橫孤雲出洞口蕭然移我情

馬山小瀑布

白泉奔一岷岷高激其怒時見雲霧流隱聞雷雨度風來滿
空谷颼颼感日暮日暮山色深惆悵失歸路

槐村田家

大雨在高山大日在四野老農念天時惆悵青松下

留雪草堂

久託城南居塵高日景短草堂傍青冥新莓自階滿蕭蕭石壁陰希光下清淺零露在花枝灑灑晝不散露沈花始稀坐看歲華晚江海有長風崑崙阻層巘嘆息遊仙人躡沒不知返

山中

白雲山之上青雲山之下雲山時一開遙見幾顏舍綠草簷際生飛泉牖中瀉

劍門峽

峽在黃婆洞要仲子記所謂豁然中開者是也險與恢奇水石爭扼予覽蜀記稱劍閣木門之勝當不是過用錫茲名繫之以詩

巨塊中開徑東西立崢嶸崎劍門峽石濤勢相傾誰謂天地寬茲途亦不平循循出幽阻忽若登層城臨風一呼嘯豁達來衆靈山河具纖末帶礪非虛名君看野燒處耿耿飛秋螢東偏有石室蘿蔦緘丹經披藤取之讀可以得長生

賓竹堂雪月次王訥夫韻

皎月照何處淒淒滿園雪荒穢潛其下松竹相孤潔空堂留虛影淋漓動容色我欲窮其微內外無可說獨有商山翁燒石煮芝蕨

建溪雜詠

劍山絕雲表削出青芙蓉下爲處士宅上與天門通

劍山

水自太平來劍是歐冶出一日三磨礪寒風夜瑟瑟

劍溪

清嶁扃石曰中有紫金丹我願假藥力一上碧霄看

丹崖

枯梅幾千樹花落何紛紛天香亦已靡人世終不聞

梅林

南山何迢遙迢遙走數里荒林絕采薪虎豹日中起

南山

上堂列詩書下堂陳農具外館何蕭蕭三株女貞樹

蘭拙堂

斷岬垂朽木寒潭十尺深飛鳥縱橫至不亂釣魚心

橋頭潭

華蓋老青山石室衆仙聚白雲不可羈高飛向天去

華蓋山

溪水流東南劍山倚天外洞口翳高林風雲晝夜會

石羊洞

稜離獅子岬碑兀驚猿度時有采薇人荷蓀歸日暮

獅子岬

存吾園雜詠

何處風雨來亂我堂下竹蓬頭向主人不解理裳服

賓竹堂

松條不厭寒松子不厭飢君看閣中人日夜松風吹

隱濤閣

飛甍隱深處神鬼肆幽躩時有青鳥來來奏雲中樂

瘦雲亭

君臥存吾園我歸劍水曲開懷向明月何事煩沐浴

浴心池

延賓白雪寧不築黃金臺奈何寒極處尙許熱人來

水房

下里諸年少走馬紅蓮渠笑爾窮廬士年年空讀書

少廬

讀書何爲者或曰渡滎舟季子持梁後不復理陰謀

半鱸

幸得託高處不受棗施淫荒荒風雨夜君子振哀音

蘭嶼

憩馬山

上山稜離石老馬不可度石上千年苔斑駁經霜露天雨東

西流山風南北聚遙聞江濤聲散入青松去

賓陽樓看雪

大帽乘酒勢登樓一長嘯北風吹雪來山河儼相照欲向此

中言表裏集元妙

桑溪田家

山寒日彩薄秋風淒且亟田疇旣無事可以辨稼穡餘日盡

償貸晚豆飽蝨蟻芥菜持作羹甘苦半年食誰念刈穫時家
家有饑色

龍鬢田家

歷歷山木下遙遙秋風起藉此秋風力四邨罷耘耔歲績雖
云薄亮能完衫履念我有餘粒堂上足甘旨况乃雞鶩肥頗
復習儀禮醪醕不外沽梨粟相代取周旋茆除下杯酒以爲
喜夙昔闕重炊浩歎無窮已豈敢忘貧賤常恐成流徙惻惻
懷饑寒于今獲生理

溪園秋夜會王世章李應熙飲茗歌

李先生王夫子且飲我山中之白茶啜我園中之白芷浮雲
萬里不停陰莫向古今只愁死大堂經語危壁高候星閃閃
搖天市二君胸次羅諸天傾出情懷不滿紙別有幽期說未
得君心我心都如此何處荒雞唱呢呢亂我談聲傷夜促前
山之雨北山雲東家歌舞西家哭爭向東家另歌舞誰念西
家哭聲苦哭聲由來徹八荒我輩聞之將何補從今偕作華
山人一榻秋風枕左股

七里山

翰林 熊爲霖 新建 鶴嶠

我來雙芒鞋尋勝恣奇詭一線盤羊腸行行已七里青山蕩
寒夢縹緲發神理上有千仞嵯半壁撐天起下臨深碧淵潭
潭不可底螭鬣生幽光神奧安所止險折紛藤蘿元官靜太
始一亭復一亭憩息托烟水悠哉淺瀨湍清吹滌雙耳

宿烟港田家

暮色凋霜風撼撼響丹麓中田望衡宇愛此田家宿門倚雙
女貞茅茨堆古屋東籬結豆棚清翠滴寒竹屋角棲雞豚溪

正宜照示 卷四一
四百九十六
邈引黃犢困廩亦具陳爲我供脫粟雞黍聊殷勤丈人禮相
屬酒酣談農桑課稅已具足再拜前致詞毫素懇尺幅感此
野人情走筆蕩寒燭起看霜天星餘嘯振林木

字雲巢雜詠

古調不復作琴瑟爲荒涼苦心發高響海水回清滄

講堂

高處不勝寒時有白雲到持贈亦復難婉轉約懷抱

雲巢

空山無一物月牖開前除人影夜初靜涼月窺潛虛

象居

大畜山在天五嶽起方寸矮屋八尺餘中有數千仞

約軒

匡廬有鉄船石瓢十三幅昨夜西風來吹影落空谷

定帆

紙窗益虛白石榻生青苔時作風雨聲秋從天半來

聽蕉

莽莽輒紅塵不到鐵堂峽幽夢時復醒竹雲虛颯颯

隱雪

斜照冷初碧繁陰落虛塢鐵篋從風來伊人不知處

柏塢

綠雪愛幽僻虛光生參差茶烟雨初歇鶴影來遲遲

竹鬢

局外亦不喧局中亦不寂爲掛松丈人掃逕與朝夕

琴亭

香雪迴春雲未許春風掃拂琴時一彈坐看青山老

梅花逕

隔村烟火遲濕雲吹不去葉葉爲徘徊相思不相語

蕉垞

東風吹小圃小圃積寒莓如何幽絕處還有美人來

海棠圃

曲澗流寒泉蕭蕭五株樹烟雨吹窮廬門向板橋渡

柳澗

尺寸何森巖轉境得清悟一折一竅然不記從來處

知步

大壑問主人虛舟向誰寄去住兩無着蕩我空山翠

壑舟

字雲巢十二月七夜雨

寒月夜初碧溪口雲欲張飲我約軒酒燭影生青芒天地忽
賁鬱風迺跋扈嘯天上走三峽失勢翻瞿塘萬木不可支震
動開入荒八麓暗蝸蚪百怪疑入腸石立霹靂門蛇鬼歛回

皇神魄所素定險賊貞其常安得雙玉瑤吹噓乎陰陽開巢
看青山山氣何茫茫

月夜上三硤灘

雲奔雨驟雷磅礪三硤灘水何湯湯黃牛白馬駭不辨飛濤
直下翻瞿塘篙師舵師率險力毫釐得失神倉皇有如楚漢
雜沓簇旗幟雌雄一決爭滎陽又如井陘隘口束萬馬長平
草木爲顏唐一輪霜月照平野萬象竦立山徬徨回波積勢
潭影黑魚龍戰乏酣睡鄉我亦醉暝聽清鑿耳根洗淨天清
涼

賓竹堂夜雨留別余薈菴少廬

我來烟雨秋淋漓燈沈花影高吟詩酒強詩力透十札君家
兄弟分道馳逸響回秋注欄溜騷騷浙浙長歌吹及今別歸
歲云暮東風掉轉蒼雲旗存吾園中舊雨痕積成新雨芬愁
絲寒雞夜半聲喔促欲別不別神守遲相對且復傾一尊松
濤倒落天四垂賓竹堂西有素壁霍然破雨爲留題

同字雲遊黃婆洞歌寄于明水賓時巢子楊光斗張任

高懿盛琴并集

空山別有神輿地奔走靈厓爲氣勢電霆淘布生神光鬱結
天荒不知歲玉清宮側二里許七折山腰草根細懸空崩崩
窺幽深上捫神霄下無際一潭沁碧當峽口風雨龍蛇所盤
會丹臺丹曰何雷轟摩厓蘚蝕神仙字劍山季子古石榻年
年積雪生寒翠于明乃復得流月一簾白濯洗秋霽水光月
影虛融融迴波不忍別山易劈開飛峽開重關倒落濃陰垂
薜荔日芒蘄蔽交龕天窅然奧宅緘其內磊思潭水瀦肺肝

綠暈沈沈生黶黶嵯頭飛瀑挂不得小作三疊停鏡吹石屋
藏書深委宛玉冊琅函蘊元氣黃婆釀酒松花香滴泉甘冽
有餘味當巔四眺山河空招揖山靈與進退跳珠泳筏亦偶
然諸君三昧出遊戲時諸子取落木葉爲筏自崖噴珠縈擾池中而出蒼茫豈復有
窮期狂歌一讀字雲記幽鑄瘦結古釵痕我亦孤吟竊其義
萬二千年誰復來好爲愛惜搜元秘以上見緘山集

送別盛水賓歸武寧

編修 楊方立 念中

劍山才人子墨客下筆琅琅走金石披襟風月酒百盃抵掌
經綸喙三尺長安三月聯履綦秋心搖落秋風時悲歌擊筑
荆高市眼底廓廓無羣兒趙州草沒平原墓千金駿骨無人
顧春明門外路三千長風吹女天南去天南去莫徘徊男兒
一事不稱意便當拂衣歸去來秋原之菘春田韭青山可樂
雲可懷安能鬱鬱逐塵網百年不得心顏開君不見南州高
人徐孺子修名砥行臥蓬纍鶴書屢促猶不起至今風被東
湖水見默堂集

逐虎行

邑貢余 躑少盧

余應觀妻盧氏事姑甚孝觀他出其姑與叔皆病臥
一榻夜半虎破壁攫去盧急逐之虎棄叔取姑行里
許盧追及之力與虎角竟奪姑還時盧懷娠明日臨
產力盡不能免大呼而絕予既奇其事又傷其死作

逐虎行見列女

日落西山月出東隅昊天云暮寥闕邨居嗟我姑叔頽然病
軀阿夫于役誰與扶持深谷逶迤野樹風悲四山戚戚行當
乖離行當乖離虎突其籬姑落虎口叔亦從之扼虎之吭倚

虎之足止山下山皇皇追逐虎馳亦馳虎驟亦驟奮呼擊虎
沙飛雲走虎駭而奔阿姑乃脫負之俱來聲淚畢竭虛室蕭
條殘燈欲滅力盡氣糜臨盆倉猝天命伊何奄然就卒我悲
其遇更壯其烈是用作歌以昭迺節金石可殘此衷若揭日
星河漢耿耿天末

豫寧雜詠十二章

面面迎風起窅然無向背望外晴嵐飛虛亭豁新霽四望山
峰勢如湧出萬頃欲參天長風吹不去只在白雲邊危壽峯
一棹歸何處茫茫萬仞山寄語船上人維纜入雲關石船
主人真好事開懷只探雲變滅爲雷雨吞吐盡氤氳字雲巢
好風自南來飄飄芙蓉葉捲簾受微涼清香並相接延薰堂
洞留邃古名飛泉雲際落秋風浩蕩來虹霓滿巨壑宓善洞

頽岨延落日猿猱不敢度獨有采芝翁披雲出此路

擊賊崖

巨石臨溪流垂綸亦已久但看得魚時擲竿隨折柳

釣磯

古松成連理枝葉正相當清風一送響歷歷奏笙簧

連理松

高梧懸秋影藜桂發幽芳榮苑不相及托根尙同方

梧桂林

老柏何披離翠色落深井汲得仙家泉令我心魂冷

甘泉觀

几上青苔老几下冷泉深涪翁一局後寂寞到而今

奕几

遊長墅原同陳日新

尋幽恣遠意迤邐何所窮解衣陟層巘披榛探神蹤怪石裂
鬼斧危岨逼蒼穹俯眺駭溪流仰矚眩山風山風入溪水激
蕩生姿容落日歸巖穴青烟繞長松寂寂人境暮遙遙天象
空攜手高陵上朗然開心胸

遊南山丁仙臺

南山接長野，蠶叢境獨開。曲徑轉幽壑，怪石上文苔。我藉樵
牧力，得到丁仙臺。仙人不可見，空翠滴人衣。嚴冬日色薄，寒
氣鬱崔嵬。陰籟時浙浙，如聞笙鶴歸。坐看烟雲起，萬狀互旋
迴。久乃變化生，其端莫能推。何年謝塵寰，結茅向山隈。山隈
扁元奧，或有仙人來。

存吾園候月

吉水汪 軼邑人
訓導 魚亭

薄暮倚空堂，遙見松濤騁。暝色落高原，窮華蕩。淒澗衆鳥相
與來，愛此深篁靜。清響豁幽陰，皓月開新景。娟娟林竹光，參
差媚虛影。觀其離合意，杳然心魂冷。靜理莫能言，懷抱從茲
永。

孝烈坡歌

廉村葉氏婦，周永英明末。流賊之亂，扶姑避子，走避

山中。卒與賊遇，被擄。賊欲殺其姑，英抱姑項以首迎。刃賊釋姑，挾英與子去。越一山至坡，欲污之。英厲罵，不從。賊殺子以威脅，而英罵愈厲。賊怒，亂刃俱下。尸無完骸，故其地至今以孝烈名焉。見列女

孝烈坡頭一杯土，長留碧血映千古。過者弔之慘，以哀鄉人
不忍道。其苦時當明末，兵氣流賊羣橫掠，聲如虎。葉氏舉家
匿山中，老姑幼子俱被擄。孝婦貞心動天地，賊渠肆虐誠妻
楚。老姑幼子生死時，乞賊罵賊心無主。姑得生還，豈計身可
憐。刀下兒呼母，此時恩義兩難全。睜眼看濺兒血，處烈性淋
漓。赤刃頭骨碎，魂飄滿山樹。山樹燐飛百餘年，日月照之光
常注。

曉起望羅劍諸山

拔貢 楊 屋南昌
子載

開我昨日牖不見昨日山觸目生變幻造化終不閒巢居知
天風奔泉曉潺潺雷峰寄遙興新晴亦良難悠悠阡陌中忽
如隔鄉關林端見飛鳥何時一來還

青牛洞 張寧

他鄉入眼川原異此中却有避塵地碧樹難銷望闕心金甌
那識忠臣氣吁嗟乎人心不同乃如面盧杞之奸我未見

麻潭哀 胡紹遠

麻潭雲起風揚沙裂我壯士破我家上不爲星辰下不爲河
嶽化爲厲鬼出復沒胡紹遠今何處白日荒荒潦水怒

訪字雲巢

主事 陶其懷 南城 字中

行役既已倦客心飛不了艱難一相見握手難草草况我望
遠情夙與斯巢繞爲我開北窻高林延佳鳥寂坐衆音生野

風吹香皎渺渺出巔雲日夕巢中杳不有素心人何以清懷
抱

酣碧軒爲盛季子歌

主事 潘從龍 南城 雲五

軋軋機中女皎皎顏如玉十年抱幽貞瑱髮已局曲庶士伊
可懷豈不念膏沐如何奔運徂賣珠猶補屋上山采白華終
朝不盈掬薄言貽所思殷勤事結束歸妹固有期生事已云
蹙日莫風颼颼三嘆倚修竹

元音不偶俗聽曲自有真淫哇恣嘲哂蠅聲振秋旻默運固
使然亦或乘要津其中奮雌黃耳食爲屈伸安知千載上俯
視生長嘔自從建安來長短難具陳慨彼供奉仙已自傷荆
榛何以振元化再使王風醇遐哉終古事敬矣山中人

隱雪

從龍自盱水入修水訪字雲先生於巢時方新隱雪
之室徙倚水窻琴瑟相依夜闌飲酒縱談風雨交集
慨然賦此留別且與巢中諸子爲他日重遊之約云
虛白迥朝莫流輝生素寒夫子真儒者宵然逸雲端天地相
摩盪雪月爲波瀾悠悠明晦心流盼起長歎古道旣云邁大
雅頽以殘延佇待來茲展轉屬艱難元宰留冲淡一縷遊姍
姍自非靜者衷孰與深往還嗟予事行役千里窮奇觀相對
未及久征馬又悲酸人生多倉卒所親亦寡懽重遊尙何時
三復繞修欄

南阜古樹行

廟門老柏不可當鬱葱千尺排天闔十圍銀杏倚屋立晝陰
窅冥山鬼泣古槐詰屈姿稜嶒盤拏九曲山風奔偶來憩此
坐忘久鳥語不聞聞獅吼交柯接葉相飛翻蒼蒼雲氣隨人
走我聞滄海踐作塵復見松柏摧爲薪何人大力培至此此
中呵護疑有神遂使手澤留輪囷酒酣相視一改容水田漠
漠三蛟龍已上見友巖集

遊柳山

歲貢盧金鏡邑人

終南有捷徑亦復窘其步可惜古今人出處難自如柳公事
幽討頗窮山水趣如何此托棲終不失遭遇我來值深秋高
舉每驚顛佳氣鬱清芬野烟蕩寒素山泉無復流舊井久荒
涸古人去已遠遺蹟委霜露至今讀書處但有青雲路徘徊
獨放歌悲風起高樹

廉村步月

月出羣山高天宇如清晝隨步到平陵幽襟光欲透豈有結

要心愛之常恐後精神寂寞時虛靈相授受始知夜氣真已
復無聲臭誰向此中言遂得盡元妙

泗洲寺

蘭若多清幽此亦清幽處綠竹蔽門深不知臨廣路春色自
親人遠得千山趣坐看雲霞生變幻紛紛朝暮未肯出塵寰徒
爾閱多故解誦涅槃經何爲終弗悟

芙蓉池

張任

山谷晚風涼主人坐芳馥露下已盈盈鴛鴦未肯宿

疊蓮巖

皎月照空山清風幾度掃結根安可窮魂魄養深好

孝烈坡

日月久不到幽魂此失路流螢高下飛蕭蕭風雨暮

玉枕山

山月象外明山花象外鮮歸鴻來天際縹緲晚風前

嚴陽山

邑舉人楊光斗文雪

瀑布下層岬危湍激險阻兩岫羣峰高一溪深盤沮溪橋嶺
半浮巖雲空中吐颯颯風雨來隱隱蛟龍怒隈隩不可窮沿
流上壁隴西望文魚洲南過飛鴻階古木枝葉淡奇花意容
與獨有鳳凰塘游人何踽踽高響聞天籟石骨爭軒舉山水
信有神竅森成今古誰懷洞中天坐忘雲霞侶嗟予重行役
雙劍鳴逆旅今日憩山陰明日離山墅意象雨茫茫客路空
延佇

白石溪夜坐

董逃行

拂白石兮揮絃空山流水宵然芙蓉月露涓涓照我衣裳翩

翩如此良夜難言

遊黃婆洞

洞中幽雲生時與遊人紐榻寒鳥自鳴石門猿獨守當年風
雨處丹灶復何有悠然磊思潭年年流月日

翠雲寺

回風蕩幽巖碧影落樵路幽禽時一鳴窅窅不可度

疊蓮洞

落日滿空山流影紛若絮春風吹不開秋風吹不去

南渡蚤發

邑舉人盛元績蒼林

步屨出城郭日曉初秋罔流雲泛巨河舟楫方復整西風蕩
微波淡此清江影鷗伏櫓聲閑魚出機心靜蒹葭日蒼蒼獨
抱晨光冷

東郊紀遊

半規隱層巒寒暉流素影緣源路未窮葉落行踪冷一木架
長橋深造無人境微星出樹間皓月生東嶺野寺落疎鐘爲
予發深省

丁仙厓

盧琢

暮雨宿南山丁仙雲際暝豈不懷寂寥終與世塵迥

破石潭

毒龍走江心仙人斷此石石裂不復合鼃鼃以爲室

石鏡山

瑩瑩數丈厓山鬼對之泣絕壑風雨多念我衣裳濕

龍潭石

巨石立江干江水深且黑潛亂落明珠象罔求不得

遊橫塘寺

羅應權

白雲在山巔我居山之下經年來一遊始覺吾心暇馳驟素
所懷遠行言欲駕僧雛牽我衣俯仰於雲罅幽徑倘可通他
日尙容借

遊擊賊厓

余

詠建昌少哇

西山之麓石嶺岼下有深溪何漫漫丈人盤踞幾千秋危濤
削出高難攀曾聞小醜竄山郭呼羣引類恣劫掠飛騎四出
天地昏行者倉皇居者愕時有英雄畫奇謀大義軒軒扶斗
杓草木烟雲皆吾兵一夫當關萬夫却至今餘威在山林風
雲合沓滿邱壑我來弔古四月中禾黍油油山花濃蒼藤倒
掛百尺樹飛泉奔瀉如長虹厓前厓後看碑碣古人事蹟何
其烈颯颯陰風吹日暮徘徊厓下不能去

覽邑志有感遺詩以告來者

癸酉年作

余志達

康熙初年歲丙午郡志徵修檄吾武吾武邑侯雲夢馮開拓
心胸爲盛舉斗牛分野煥人文艾邑西安更僕數草堂笠履
鄭山人菡萏鴛鴦成吾侶蔡家老子世澤長山谷遺篇今可
覩旦復旦兮風雨深百年文獻存幾許故家舊牒飽蠹魚殘
碑剝蝕歸荒土茫茫墜緒待修明逸者蒐羅闕者補燕許手
筆不雷同皎如日月經天宇柳山削立青芙蓉修江倒影雲
中樹奇崕怪石鬱蒼蒼英華一洩光千古大珠小珠貫琅函
上獻輶軒供采取山中小子作遺詩後有作者應吾與

丙寅冬登雞籠山抵仙姑寺

張問達

夙心寄高曠徐步恣遊玩遐矚雞籠山乃在天之半羣嶂互
回環一峰呈婉孌我欲踞其巔縱目窺星漢循行山徑來崎

崦非所憚解衣犯荆榛猿背引枝蔓蜿蜒陟平臺行隱千秋
觀濃陰覆殘楹古木巢鵲鶴天日漏微光風影時歷亂遠水
林外悠悠山不可辨秋聲斷續聞暗響流深澗幽意已留人
心魂逐飛鴈無路凌絕巔仰面空顧盼安得五丁神縈紆上
雲棧

廉村

羅穆邑人
睡泉

人烟高下出一隈復一村山環雲不斷水遶萬家門沿流問
風俗波濤時往還采采清溪花更涉平淺源澄我百年慮澹
然無可言

叢雲洞卽上董源

邑歲盧廷亮星湖
貢

叢巖何代闢我來發幽鑠一水通窮谷奇濤喧石蹠溪光時
掩抑徑盤絕壁下羣籟泛希聲白雲袖中瀉遙望有老翁臨
風自瀟灑舉手謝遊人營營何猥瑣始知桃林外故有遊仙
者

柳山

張濱

峭壁臨大河秀出西南許萬丈干日星勢與匡峰伍歛然湧
翠來縹緲蕩巖宇蕭蕭天上風雲烟互吞吐我聞舊隱者安
居昵其所山鳥相與迎山客相與處偶爾度幽徑散帶憩石
戶時或起謳詠逸響通林塢意景渺難窮清興由茲舉始知
山水妙多爲文人主何日託山隈復此坐風雨

冰文巖

積雪凍深山野火鎔不去所託何堅幽元奧生風露石魚藏
其中水文亦森著縹緲空巖外山烟蕩寒素我欲窮妙好盤
曲得清悟

石洋洞口晚眺

晚碧深樵路山水亦元奧何處蕭蕭笛高空響清妙清響入我絃殘月度遠照偶然天地心于以寓新好

溫泉

雪花落不自秋露滴不寒悠悠井中水紫氣結雲端其間氤氳意造化深盤桓

遊叢雲洞

邑舉人余鳴珂讓麓

岷石多奇詭幽雲更回互溪水曲折來危橋屢驚顧及茲秋氣涼潔意窮其趣披榛尋古洞盤紆得微路石前時小立隱隱見村樹中有仙人樂吹噓及日暮我願常託棲習靜起遙悟

龍潭偶詠

吳 沄

漁夫不厭晚鷺鷥不厭寒雙櫓搖秋江方將潭下看鯉魚語新鱸何故近波瀾萬丈龍之門暫可息雲端

遊冰文崑

余世孫

皚皚太古雪磊磊成臺榭中有雙鯉魚蜿蜒戲蓮座海水何嘗枯托足於崑下倚竇久徘徊涼風生石罅

山中雜詠

天風吹不散彼此互回環亦知噴霖雨未肯謝深山叢雲洞偶然垂絲綸潭水浸衣碧遊魚不受釣坐此三太息釣磯

天地不厭奇巨靈不好逸萬狀呈低昂就竇開堂室曾溪巖

春風昨夜來荔帶密如織山雲深復深樵夫未相識薛荔崖

清泉漱山根虛影蕩林表寒雲流不盡臨風時縹緲流雲石

劍山何嶢嶢劍水何茫茫終日隱雲霧未忍露鋒鏖劍山

石室有真人長年理修髮殷勤爲誰容乃亦戀巖穴
蒲帆揚不開疾櫓搖不去年年春漲深茫茫苦難渡
石船

三碛灘遇風

三碛灘頭石齒齒狂風怒號捲江水龍鼉躩立魚龍飛雲犇
雨驟萬怪起篙師舵師不敢停扁舟轉側驚濤裏欵乃喧
何勞勞得失沈浮爭尺咫左櫓右纜不得前一日舟行三四
里吁嗟連年走關河石尤于我長如此焚香酌酒祭江神好
風送我上空濱

石羊洞浴羊池濯纓歌

盛樵

石羊洞口風初涼石羊洞裏已飛霜世上唯知厭清苦誰來
洞裏覓石羊洞裏延山皆種粟一瓢一豆亦自足不羨人間
有稻粱顧我令我情多辱我來池上思濯纓濯纓復恐石羊
驚池傍老人牽犢去謂我汚他犢口清

仙人潭

余光廷
訂瑰

獨立仙人潭竚望仙人至白雲度江水翩翩不我遲

青牛峽

我自山中來行過青牛峽不見騎牛翁滿山飛秋葉

靖公厓

盧宣梧

蒼厓依絕壁寒雲委溪水中
有萬斛泉晝夜流不已我欲陟
其巔崎嶇不我以丈人何嗟峨
岷危濤紫烟裏四顧發高吟
颯颯狂風起

楊田看雪

朔風何處來吹作天上雪
雪飛鳥亦飛深山愁欲絕

遊芳谷巖

葉雲

幽芳儲山腹春風幾度吹我來窮寒榻瑤草養淡姿遙見空樓外遠樹夕陽遲尙有雲梯在縹緲不可持

羅巖

雪壁明奧宅雲波蕩欲流清風颯然起虛響度高秋

大堯山

大山何堯堯巋然立雲表白日蕩我襟萬象空中繞

登觀音閣

費煌

倚山開峻閣隱几聽江聲佛燈懸空外悠然遠世情我來延高眺時當秋氣清渡口邨烟合隔岍遠峰橫山川長如此遊八遞送迎倚欄一長嘯蕭蕭聞雁鳴

丈人峰

余霽

奇峰隱天際蒼然暮色深崧靄千山秀蕭疎一水吟年年空

悵望唯有白雲心

積雪石

盛韻

何人斲寒玉注此冰瑩瑩晶光所流露山谷亦聰明我欲詳其妙縹緲不可名

己卯夏修葺尊經閣志感四章

盧全迪邑人康夫

經始幾何日朽蠹輒如斯先志未敢負惻然憶曩時亦知莫爲後手澤尙堪依低徊坐涼月不覺露侵衣亭亭階下柏閱歷風雨深哲人雖已逝猶覩栽培心經尊閣亦尊石徑白雲屯幾回勞仰止寸心難具論

玉清宮品茶歌

葉期緯

天下何處茶山好蒙頂界崑俱是寶鷹爪雀舌蘊寒香未若鐵斧真神巧浸淫太平絕頂之精華淨人肺腑雪皎皎自然

道人遊其巔日沐月浴顏少小呼童汲引石船流文火細烹
坐清曉蓬萊和風暢所懷合室松聲鼎上繞瓷杯靄靄碧雲
橫飄飄素香飛不了王喬令威齊下車遙指山茗是仙草安
得滿取注人間大潤羣生長不老

尊經閣卽事

邑舉 盧琳 松吾

己丑初冬廣文蔡愚山以尊經閣梁柱欲折告予兄
弟予偕三兄琮八弟瑜葺之初先君子創於丙辰仲
兄迪葺於己卯十年間竟又如此謹步原韻四章聊
以志感

盤磴陟高閣風雨已如斯回首趨庭日不堪白髮時
四望與玉枕山色自因依開窗延遠眺殘照下雙扉
乃知崇經學由來託意深敢謂千秋業無愧古人心

十載牢騷意對此白雲屯長夜一尊酒默默不忍論

登柳山訪貞公祠

陳毓江

柳公祠堂碧雲中天然懸石捲清風我欲誅茆訪遺踪雙峰
翠削青芙蓉仙鳧飛去碧雲封

柳山讀書臺

劉拭

寒山多歲月石室從中開一榻臥雲根披卷清塵懷讀罷時
高眺鴻雁自西來晶晶天宇曠四望重徘徊昔日讀書處今
爲弔古臺臺上有麋鹿臺下盡蒿萊荒烟沈不起斯人安在
哉石榻如重下臨風傾一杯

登吳王峰絕頂

舒素

諸峰高矗東南立一峰去天不盈尺天風掖我上峰頂鐵塚
雲深何處審舊志註世傳吳王塚以鈇覆磴轉飛帷勢盤窩種瓜人去老

碧羅世傳孫鍾種瓜于此迴瞰溪流走正練北注三碕如環掾匡山左

蠡排天際勺水那曾藏曩扇振衣長嘯谷風生張口呀呀亦有聲谷深穴黝門重束秉燭遊之夜不足峯于張口處有歸洞深不可窮來流水桃花源蓬島迢迢在眼前

天柱山

邑廩余光策省之

秋日佳氣多微涼生襟帶散步度平林鳥鳴高阜外高阜高無際石骨瀉清瀨白雲起空中團團上松蓋樵牧自往來猿鹿無驚害眷彼深山幽窅然發長嘷

獅子嵯

葉世熙

不識幾千秋長此獅子嵯綠盤踞江之濱霧隱如雲宿客帆任斯須江風自往復我來秋正晚登眺恣所欲嵯上車馬喧嵯下蛟龍浴

重葺尊經閣志感

邑廩盧為郭若虛

聖道昭日月先人依其光巍我肅廟貌尊壘有餘香高山興層雲惠我碧池水雲歸山亦空漑滋無窮已我懷其如何惆悵勞仰止

瀆水嵯晚眺

吳江

青青嵯畔松鬱鬱嵯下草中有素心人徙倚山之島白雲宿前峰夕陽迷古道好鳥亦歸鳴伊嚶聲自好清泉落檐檻清風滿懷抱

羅峰

邑副盛翼垂雲

羅峰高不已上欲捫天星其麓有靈窟溇然通洞庭

自在菴即古蘭闌寺

進士李騰淵德安人

伊誰設蘭闌枯坐以終老無人花獨開自在幽香好

春日遊柳山尋貞公讀書臺遺蹟

邑貢熊鎮瀾 水治

少小慕茲山引領頭半白萬卷聖人書予徒耳食寸心苟
或污一身良偈仄如彼終南峰何以見心跡柳公愛幽棲大
節靡淄涅山靈汝何緣迺與斯人暱遂合據榮名岩岫生顏
色草木自芳菲烟雲自離卽骨立青霄中造化爭奇特拜瞻
讀豐碑千秋情脈脈

遊崇福寺

何事關心者茗椀與詩筒攜我二三子眷言訪禪蹤桃花漸
飛落柳絲正豐茸入山路已迴梵刹敞晴空逸興生幽賞虛
無見淵衷深心得所契尊前意俱融迢迢千載後風流憶遠
公

春日過瀧溪

熊應瑞

翹首望青峰峰峰入雲表薄言入瀧溪但覺衆山小頭上奔
懸流足底度飛鳥策馬山之巔風來日初曉從此嗽春泉倏
忽雲縹緲

饒灣望柳峰有感

陳介圭 白夫

蒙泉在山莫阜黃龍修水西來左蠡其東饒灣十里乃紆乃
縈平潭夜靜星月溶溶柳峰倒影羅岱橫空吾愛吾廬宛在
江中

劍池懷古

李吐芳 雲鳶

池草萋以綠池水清且盈我聞旌陽合捕蛟途所經拔劍一
淬礪寶光何瑩瑩遊魚避其影妖魅潛其形始知仙人術磨
鍊鋒乃成至今斗牛上夜夜劍氣橫

節婦潭

余珮 韻珊

淒清節婦潭潭水深且潔澄如節婦心不受纖塵涅戴君臨
別時節婦何嗚咽可憐捉月盟滿紙泪與血去住兩難全死
生容易決至性誠激昂鬼神助其烈至今潭上雁蕭蕭嘆殘
月

補遺

石鼓歌

明庠 范 瓚 維新 生

古有神物名石鼓碑文字跡半消磨溯自攻同騁雄駿紀功
勒石輝山河鴻篇鉅製那可讀如箝在口艱吟哦韓子去古
既已遠俯仰曠代心研摩張華亦有桐魚說博雅淹通良足
多悠悠世歷千年後豈復曉此名應訛我祖卜居欣戾止鑿
泉堊出山之阿太璞天然去雕飾含章宛爾供摩抄亦似篆
痕久漫滅淺深隱現如旋螺瑰奇崛起不終闕寶光閃煜涵

金波追琢既成必有用驚詫未識云如何會當特地發昏瞶
一聲千里揚休和

